

قدمت على المسرح الجديد في موسم ١٩٧٨ من اخراج
الأستاذ شاكر عبد اللطيف وبطولة الأستاذ نور الشريف

بكالوريوس في حكم الشعوب

المشهد الأول

المكان : غنبر النوم فى المدرسة الثانوية العسكرية
فى بلد من بلدان العالم الثالث .

الزمان : الأمس أو اليوم .. وقد يكون غدا ..
(مجموعة من الطلبة مكونة من ثمانية أفراد
يقفون فى حالة انتباه صفا واحدا وظهورهم
للصالة .. أمامهم يقف ضابط هو المشرف على
المدرسة)

المشرف : صفا .. انتباه .. ولا حركة .. أشد من كده .. صفا
.. انتباه .. ثابت ، ولا حركة .. منضبطين دلوقت ، لما
عرفتوا انكم حتروحوا فى داهية .. صفا .. لما عرفتوا ان
الموضوع خرج من ايدي .. انتباه .. ولا حركة .. لو
تعبان قرصك وانت واقف فى الصف ، مالكش دعوة ..
ثابت ولا حركة .. أقف كويس يا طالب يا بعكوك انت
وهو .. انتم أسوأ دفعة دخلت المدرسة .. حالا حايبجي
حضرة الضابط وكيل المدرسة وحضرة الضابط المدير ..
حايبجوا يشوفوا كل حاجة على الطبيعة .. كل المنوعات
وكل المصاييب اللى معاكم حايشوفوها بنفسيهم .. ويتصرفوا
فيكم ، أقف ثابت ، ولا حركة .. بناقص سنة أولى ..
تترفدوا وتيجي دفعة تانية .. آلاف الطلبة واقفين على الباب
نفسهم يهخلوا .. ثابت ، ولا حركة ، خلاص .. أنا أعلنت
فشلى .. أنا .. خريج أكبر كلية عسكرية فى بريطانيا ..
مش عارف أسلك مع شوية عيال كانوا فى الاعدادية أول
امبارح .. أربع شهور ومش عارف أعلمكم العسكرية ؟ ..

المدرسة خدت قبلكم أربع دفع .. وفيه دفعة اتخرجت ..
أقف ثابت ، ولا حركة ، .. ماشفتش حد زيكم .. استهتار ..
طراوة ..

(يدخل الوكيل والمدير)

المشرف : (صائحا) .. ثابت .. ولا حركة ..

(المشرف يؤدي التحية للوكيل)

الوكيل : صفا .. انتباه .. ثابت ..

المشرف : ولا حركة ..

(الوكيل يؤدي التحية للمدير)

المدير : صفا .. استرح .. كل الطلبة الى في المدرسة ، باعتبارهم
أولادى .. وانتم عارفين كده كويس .. بس الظاهر الانسان
يبقى له أحيانا بعض أولاد وحشين .. واذا كان ده مسموح
بيه فى الحياة المدنية الا أنه غير مسموح بيه اطلاقا فى الحياة
العسكرية .. كل التقارير المرفوعة لى من حضرة الضابط
المشرف على المدرسة ، بتخلينى أشعر بالحزن ... المدرسة
ماشية زى الساعة ، ماعدا سنة أولى .. وبمعنى أصح
المجموعة «أ» من سنة أولى .. كنت فاكركم على وعى بحالة البلد
.. احنا حصلنا على استقلالنا من خمس سنين بس .. عندنا
ثلاث مدارس ثانوى وكلية آداب لسه فاتحة السنة دى ..
لكن أهم مدرسة عندنا .. هى الثانوية العسكرية الى انتم

بنتشرفوا بالانتساب اليها .. لحد دلوقت ماعندناش جيش
 مشحرف ... حتى أول دفعة اتخرجت .. طلعت بعثات برة
 .. ومارجعتش ثاني .. وماعندناش بوليس كفاية يجيبهم
 .. صحيح بلدنا فقيرة .. لكن تقرير الخبراء بيقول اننا
 غايمين على بحيرة بتروول .. أرضنا صحرا .. لكن الصحرا
 دى ، فيها مياه جوفية تزرع نص الدنيا .. انتباه ..

(يعودون للانتباه فى حركة قوية)

الوكيل : ثابت ..

المشرف : ولا حركة ..

المدير : انتم طليعة البلد .. صفا .. انتم الأمل .. انتباه ..

الوكيل : ثابت ..

المشرف : ولا حركة ..

المدير : لما حانظهر ثروة البلاد .. الكل حايطمع فينا .. ولا بد من
 وجود جيش قوى .. وانتم عماد هذا الجيش .. أنا عندي
 لكم خبر مؤلم .. صاحب العزة ، رئيس البلاد ، عيان جدا
 .. بيحتضر .. وده سر .. أول حد يعرفه الطبيب الخاص
 بتاعة .. وأنا .. وأنتم ..

الوكيل : (هامسا) .. الخبر أذاعته مونت كارلو .. ولندن
 وصوت أمريكا .. والقاهرة .. وبغداد .. ودمشق ..
 والرياض ..

المدير : عارف .. وكل جرايد العالم نشرته .. بس آخر تعليمات
 عندي أنه لا يزال سر .. (للطلبة) .. البلد .. مقبلة على

فترة حرجة .. وجائز تحصل متاعب .. ولى العهد صرح
لوكالات الأنباء أنه ما يقدرش يحكم ويسيب أعماله التجارية
.. مجلس الأعيان بدأت الصراعات تحصل جواه .. وذه أمر
طبيعى .. أنا باقول لكم الكلام ده .. عشان تبقوا رجالة
وتتحملوا مسئولية المستقبل .. من غيركم مش حا يكون فيه
مستقبل (يخرج ورقة صغيرة من جيبه يقرأها) ... طارق
الرئيس ..

طارق : أفندم ..

المشرف : للخلف در .. خطوة للأمام ، مارش .. صفا .. انتباه ..

(طارق يقوم بتأدية الحركات المطلوبة منه)

الوكيل : سريره فين ؟

المشرف : أهو ..

(الوكيل يخرج من تحت مرتبة السرير عدة كتب
ومجلات وراڊيو ترانزيسستور)

الوكيل : كتب ومجلات .. مخبئها فى سريره .. (يقرأ) .. ماهية
الوجود .. ايه ياخويا ؟ .. مش عاجبك الماهية الى بتدفعها
لك المدرسة ؟ فى كل البلاد الثانية ، الطالب هو الى بيدفع
مصارييف .. (يعثر على صورة فوتوغرافية) .. وأدى صور
عريانة ..

طارق : مش ممكن يافندم .. أنا ما عنديش صور عريانة

الوكيل : اخرس .. بتكذبني يا طالب .. أدى صورة بنت وشها
عريان ..

طارق : دى خطيتى ..

المدير : ماحدث طلب منك تردد .. وممنوع تخطب وانت طالب ..
أنا حافترض انك ماعرفتش المعلومة دى .. أقف ثابت ..

المشرف : ولا حركة ..

الوكيل : جيل منحدر .. أنا عشت عشرين سنة مع مرأتى ..
وماتت من غير ما أشوف وشها ..

(يمسك أحد الكتب ويلقيه بسرعة على الأرض
كما لو كان لدغ منه)

الوكيل : يادى المصيبة .. يادى الليلة الى مش فايتة ..

المدير : كتاب ايه ده ؟

الوكيل : شوف بنفسك يا أفندم .. أنا ماقدرش أنطق اسمه ..

(المدير يلقي على الكتاب نظرة سريعة ، يتنسم
ابتسامة خفيفة يدايرها بسرعة ، ويحدث طارق
فى غضب مصطنع)

المدير : يخرب بيتك .. يخرب بيتك يا طارق ..

طارق : حاضر يافندم ..

المدير : ماتردش على ..

طارق : حاضر يافندم ..

المدير : ثابت ..

المشرف : ولا حركة ..

المدير : جمهورية أفلاطون ؟ .. كلمة جمهورية دى ممكن تقفل
المدرسة وتحاكمنا كلنا .. دى حتى النسخة الوحيدة الموجودة
فى مكتبة القصر .. مترجمة باسم مملكة أفلاطون .. الكتاب
ده يتحرق فوراً ..

طارق : حاضر يافندم .. أصله

المدير : ثابت ..

المشرف : ولا حركة ..

(الوكيل يمسك ببضعة كتب أخرى)

الوكيل : كتب تاريخ .. وياريت تاريخنا الى كله شجاعة وبطولة
.. تاريخ أجنب ..

طارق : فيه تاريخنا يافندم تحت المائدة ..

المدير : ثابت ..

المشرف : ولا حركة .. عامل لى زعيم فى وسطهم .. وكل كلامه
وأفكاره مستوردة من بره المدرسة ..

المدير : شهر حرمان من الفسح .. وسبعة حجز قشلاق .. (ينظر
فى الورقة وينادى) سعد السيف ..

المشرف : أفندم ..

المشرف : للخلف در .. خطوة للأمام مارش ..

(الآن يواجه الصالة)

المشرف : دائم الاخلال بالضبط والربط وحسن انضباط المظهر
العسكري .. امبارح مریت عليه فی الخدمة لقيته نايم ..

الوكيل : الحاجات دی تحصل من حد تانى يا سعد يا سيف ..
انت الوحيد الى يجب أن يكون قدوة فى الضبط والربط ..
انت من عيله كلها سيفين .. أبا عن جد .. أبوك الله يرحمه
كان بيحط الخمسة جنب بعض ويضرب رقابهم بالسيف ..
ضربة واحدة .. عارف كده والا ماتوعاش عليه .. ؟

سعد : عارف يافندم .. كان بياخذنى يفرجنى وأنا عندى ثلاث
سنين .. عشان كده لما باشوف لون أحمر باحس انى عاوز
أتقيا ..

الوكيل : لأنك خرع ..

سعد : حاضر يافندم ..

الوكيل : ثابت ..

المشرف : ولا حركة ..

(يخرج بعض الكتب من تحت المرتبة)

الوكيل : شعر .. وقصص حب .. وقلة أدب .. طالع رقيق لمن
ياخويا ؟ .. انت عاوز تلوث تاريخ عيلتك ؟ .. ماكنت تدخل
نانوى أحسن لك وتدخل كلية الآداب .. عشان تجيب لأهلك
العار ..

المُدِير : شهر حرمان من الفسح .. وخمسة حجز قشلاق ..
غيره ..

المُشْرِف : أحمد تعليب ..

أحمد : أفندم ..

المُشْرِف : للخلف در .. خطوة للأمام مارش .. ده أحسن طالب
عندى مثال للضبط والربط .. حايفسد لو فضل فى
المجموعة دى ..

الوكيل : مش انت ابن تعليب بتاع الشرطة .. ؟

أحمد : أيوه يافندم ..

الوكيل : ونعم الناس .. عيلتك يابنى ولمدة مائتين سنة قدمت
للبلد أحسن مخبرين .. جـدك الكبير تعليب البراق ابن
البصاص .. كان يبص من خرم الباب يعرف الى قاعدين
جوه يفكروا فى ايه ..

المُدِير : (باستياء) ... غيره ..

المُشْرِف : ابراهيم كروان ..

ابراهيم : أفندم ..

المُشْرِف : للخلف در .. خطوة للأمام .. مارش ..

الوكيل : كل جـنوده وأعمامه من كبار رجال الفقه والنحو واللغة
.. ومع ذلك أبوه طلع مغنى .. مش كده ؟

ابراهيم : أيوه يافندم ..

الوكيل : أبوك غلبني لما كنت ماسك الأمن في بلدكم .. أيام ما كان
الغنا حرام كان عامل أوضة تحت الأرض بيغني فيها
لأصحابه ، ويعزف لهم على العود .. حاصرته عشر سنين ..
ومع ذلك فشلت أضبطه متلبس .. اوعى تكون طالع له ..

ابراهيم : (باستنكار شديد) .. أعوذ بالله يافندم .. أعوذ بالله ..

المدير : معلوماتي انك أحسن واحد يعرف عربى فى المدرسة ..

ابراهيم : تقريبا يافندم ..

المدير : أمال مين الى كان بيغنى فى الميز امبارح بعد العشا ؟

ابراهيم : أعوذ بالله يافندم .. ما كنتش بغنى .. كنت باقول
تواشيخ ..

(**الوكيل يخرج من سريره عدة شرائط كانت
وجهاز ريكورد صغير**)

الوكيل : أغانى وتواشيخ من كل نوع ..

المدير : شهر حرمان من الفسح .. وخمسة حجز قشلاق .. غيره ..

المشرف : الأربعة الى فاضلين من الجماعة لا حول لهم ولا قوة ..
لكن حايفسدوا .. طارق الرئيس بيعكس لهم حواديت من
التاريخ وبيشرح لهم حاجات تانية منيلة بستين نيلة .. أسامة
الزهار .. خليل الجمال .. مرسى محمد أحمد .. حسن
أبو جراب .. للخلف در .. خطوة للأمام .. مارش ..

المدير : أسبوعين حرمان من الفسح .. وثلاثة حجز قشلاق ..
على سبيل التحذير .. عشان تصحصحوا ... (لابراهيم)
ابراهيم ..

ابراهيم : أفندم ..
المدير : تعال لى مكتبى بعد ربع ساعة ..
ابراهيم : حاضر يا أفندم ..
المدير : (للمشرف) .. وزع الخدمات ..

(الضابط المشرف يحييهما ، يخرج المدير
والوكيل)

المشرف : أسامة ..
أسامة : أفندم ..
المشرف : سور الكلية الغربى .. خليل ..
خليل : أفندم ..
المشرف : سور الكلية البحرى .. حسن ..
حسن : أفندم ..
المشرف : السور القبلى .. سعد ..
سعد : أفندم ..

المشرف : باب السلاحليك .. صفا .. انتباه .. انصراف ..
(اظلام سريع للاضاءة مع كلمة انصراف وتصاعد
المؤثر الصوتى لمدة عشر ثوانى ثم ظهور تدريجى
للاضاءة)

المشهد الثاني

(ظهور تدريجي للاضياء على أحمد تعيلب وقد
بدأ يخلع ملابسه ويرتدي البيجاما .. يدخل
طارق الرئيس ..)

أحمد : حرق كل الكتب ؟

طارق : مش كلها .. الى شافوها بس .. الكتب المهمة ماشافوهاش
.. لأنها جوه القطن بتاع المرتبة .. يعنى انت يا ابو حميد
طلعت أحسن طالب قينا ..

أحمد : طبعاً .. أنا طالب مثالي ..

طارق : مثالي في ايه ياخويا ؟ ... انت بتعمل كل المصايب الى
في الدنيا ..

أحمد : لكن متغطى .. متدارى .. مش المهم الانسان يبقى كويس
المهم أن الآخرين تبقى فكرتهم عنه كويسة ..

طارق : في الغالب حاططع الأول علينا .. ولما نتوزع على الأسلحة ،
حاسبقنا في الترقية ..

أحمد : أنا دخلت المدرسة العسكرية عشان هدف واضح محدد ..

طارق : تبقى ضابط كبير ..

أحمد : تـؤ ..

طارق : رئيس مجلس ادارة شركة ؟

أحمد : تـؤ ..

طارق : بطل عسكري ، من أبطال حرب الاستقلال .. لسوء حظك
الاستعمار خرج من عندنا بمزاجه ..

أحمد : الأهداف الخيالية دى يفكر فيها الى زيك .. (لحظات) ..
أنا فى أول فرصة حاسل انقلاب .. وأمسك الحكم ..

طارق : ايه ... يخرب بيتك ..

(ينفجر ضاحكا)

أحمد : أمال انت فاكرنى حاتخرج ملازم تانى ، وأول ، وثقيب ..
ورائد وعقيد وعميد .. وكل رتبة من دول عاوزة مذاكرة
وفرق .. وبعثات .. ولما أشم نفسى ومرتبى يبقى كويس ..
أطلع على المعاش ..

طارق : نقبك على شونة .. الانقلابات العسكرية من هنا ورايح ..
ماعادتش مجزية .. مش حاتجيب همها ..

أحمد : ليه ..

طارق : عيبك انك مابتقراش جرايد .. ولا بتتابع اذاعات ..
الأمم المتحدة خدت قرار أن أى حاكم عسكري .. لازم يكون
حاصل على بكالوريوس فى حكم الشعوب .. لأن حكم الشعوب ،
مهنة .. صنعة .. فن ، زى الطب وزى القانون .. وزى
المحاسبة .. بل أصعب من دول كلهم ..

أحمد : والأمم المتحدة حاتمنع الانقلابات ازاي ؟

طارق : ماحدش فى الدنيا يعرف يمنعها .. حاترشدھا .. فيه
أكاديمية أنشئت فى الأسبوع الى فات فى جنيف ..
الأكاديمية دى حايدخلها كل رؤساء الحكومات العسكرية ..

الى ينجح ، ياخذ بكالوريوس في حكم الشعوب .. ويبقى
حاكم شرعى معترف به في الأسرة الدولية ..

أحمد : يا سلام يا طارق .. انت هايل .. فاهم كل حاجة ..
أوعدك .. بمجرد ما أوصل للحكم .. حاعملك رئيس وزارة
.. أو وزير خارجية على الأقل ...

طارق : أهو كلام .. أهو كلام بنسمعه منكم وانتم بره السلطة ..
أحمد : لا والله ، والعيش والملح ..

طارق : أبو حميد مفيش داعى نضحك على بعض .. انت لو حكمت
فى يوم من الأيام .. حاتحطنى فى السجن ، أنا وكل
الى زى ..

أحمد : ليه لا سمح الله ..

طارق : دلوقت انت ماتعرفش ليه .. لكن لما تحكم ، حاتعرف ..
ساعتها حاتلاقى أسباب وجيئة جدا ..

أحمد : (ضاحكا) .. احنا بنتكلم كما لو كانت المسألة جد ..

طارق : ليه لا .. ما هى بتبتدى كده ..

أحمد : طب افرض فيه واحد عمل انقلاب .. والتحق بالأكاديمية ..

طارق : أيوه ..

أحمد : وماعرفش عيش فى الدراسة .. وسقط فى البكالوريوس ..
يشيلوه .. ؟

طارق : يشيلوه ازاي ؟ .. حايبعتوله جيش ؟ .. حايبقى تدخل
فى شئون الغير .. واعتداء على استقلال دولة بالاضافة الى

أن الأمم المتحدة ما عندها ش قوة تنفذ بيها قراراتها .. عارف
زى ايه ؟ .. زى خالتى تقعد فى الحوش على الكنبه وأولادها
نازلين ضرب فى بعض .. وهى تقعد تقول .. بس يا واد ..
يا واد ما تضربش أخوك يا واد .. يا واد سيب أخوك يا واد ..

أحمد : آمال يعملوا فيه ايه ؟ ..

طارق : ينشروا ورق الاجابة بتاعه .. ويعلنوا درجاته على العالم
كله ..

أحمد : آه يفضحوه .. يجرسوه .. يقولوا أخذ صفر فى
الديموقراطية .. اتنين على عشرة فى الأخلاق .. صفر فى
التاريخ ..

طارق : ده انت بتقول الدرجات الى ممكن تاخذها بالضبط ..
أحمد : فشر .. لا وشرفك .. لازم آخذ الفل مارك فى كل مادة ..
وآخذ البكالوريوس بامتياز مع مرتبة الشرف .. لكن افرض
.. افرض يعنى انى سقطت .. مايقاليش كرسى فى الأمم
المتحدة ..

طارق : يبقى لك .. ويبقى لك مندوب .. بس مالكش حق
التصويت .. تبقى عضو فى الأسرة الدولية صحيح .. بس
عضو منتسب ...

أحمد : وبقية الدول حايبقى موقفها منى ايه .. ؟

طارق : هى حرة .. تعترف ببيك .. ما تعترفش .. بس على
الأقل .. يبقى معروف فى العالم كله انك ساقط .. وبتحكم
من غير مؤهل ..

أحمد : مش مشكلة .. الواحد لما يوصل للحكم .. يبقى يقلع الكاكي .. ويبقى يلبس مدني .. وما يدخلش الأكاديمية دي .

طارق : هو الكاكي لبس يا أبو حميد .. الكاكي مفهوم .. وجهة نظر .. وبوضه الأمم المتحدة عاملة حسابها للجيل اللى من النوع ده تعريف الحاكم العسكري .. هو كل حاكم يصل للسلطة بلا انتخابات شعبية ..

أحمد : الله .. انت حاتقلها ليه ؟ .. نبقى ندخل الأكاديمية ونصرف .. نشترى الامتحانات ، نشترى الأساتذة .. نشترى الأكاديمية كلها ..

طارق : على رأيك .. مش مشكلة .. احنا دلوقت فى عصر شرا كل شىء .. ممكن تشتري جوز ملكة .. رئيس حزب فى اليابان .. عصر مخجل .. ومين عارف .. يمكن البلية تلعب معاك ..

(يدخل ابراهيم كروان ، مضطربا قليلا . ولكنه يحاول ان يبدو هادئا . يجلس على سريره ، يخرج من جواره سيجارة ويشعلها)

أحمد : المدير كان عاوزك ليه يا ابراهيم ؟

ابراهيم : ولا حاجة .. كان بياكد على ماغنيش تانى ..

طارق : لا يا شيخ .. طب ما كان يأكد عليك قدامنا ..

أحمد : تلاقيه بيتفق معاه على حفلة خاصة .. عاوزك تروح تغنى للأولاد ؟

ابراهيم : أعوذ بالله ..

طارق : صحيح كان عاوزك ليه .. ؟

ابراهيم : حاجة شخصية ..

طارق : برهم .. عم الشيخ ابراهيم .. احنا فيه بينا أسرار ؟

(يدخل وكيل المدرسة ، الثلاثة يهزون واقفين في
حالة انتباه)

الوكيل : ابراهيم ..

ابراهيم : أفندم ..

الوكيل : حصلنى على المكتب ..

(الوكيل يخرج)

طارق : (معلقا أثناء خروج ابراهيم) .. أيوه يا سيدى .. الفقى
لا يسعد ..

(يخرج ابراهيم)

احمد : حاجة غريبة ..

طارق : مفيش حاجة بتستخبى .. حانعرف ..

(يدخل المشرف فيقفان انتباه)

المشرف : ابراهيم فين ؟

طارق : عند حضرة الضابط ..

المشرف : رايح يعمل ايه .. ؟ .. المفروض اى حاجة بينغها
لى أنا ..

طارق : حضرة الضابط الوكيل هو الى طلبه دلوقت ..

المشرف : بمجرد ما يوصل ييجى لى فورا .. أنا فى مكتبى ..

طارق : حاضر يافندم ..

(يخرج المشرف)

احمد : سوقه على قوى ابراهيم .. الطلبات بتتزايد عليه جامد ..
ايه الحكاية ؟

طارق : حانعرف .. يا خبر بفلوس .. بكره يبقى ببلاش ..

احمد : على رأيك .. انما انت تعتبر لغز بالنسبة لى يا طارق ..
أربعة شهور مع بعض دلوقت وماعرفتش عنك حاجة غير انك
انسان مثقف وبتحب خطيبتك .. ايه أحلامك .. ؟

طارق : أنا أحلامى بسيطة جدا .. ماعنديش أهداف ولا آمال
كبيرة زيك ..

احمد : آمال دخلت الثانوية العسكرية ليه .. ؟

(تبدأ الاضاءة فى الخفوت ماعدا دائرة الضوء التى

يوجد فيها طارق .. تظهر عايدة خطيبة طارق)

طارق : حبيبتى أنا دخلت المدرسة العسكرية علشانك .. ثلاث

سنين وابقى طابط .. لى مكان .. ومعايا مرتبى .. ونتجوز ..

بعد كده حايبقى عندى فرصة آخذ ثانوية عامة وأدخل كلية
الآداب .. مين عارف يمكن أعرف آخذ الدكتوراه ..
عايدة : ولما تموت فى الحرب ..

طارق : مش حايحصل حروب فى المنطقة بعد كده .. الحرب
الوحيدة الى احنا داخلينها دلوقت .. هى الحرب ضد الغلاء
.. ودى مش حاموت فيها لوحدى .. كلنا حانموت فيها ..

عايدة : حاخرج معاك وأنا كاشفة وشى .. ؟

طارق : طبعا .. وحاكون فخور بيكى ..

عايدة : حاتسمح لى أشتغل ... ؟

طارق : لا .. مش حاسمح لك .. خارجوكى انك تشتغلى .. البيت
حايبقى محتاج انك تشتغلى .. وبلدنا محتاجة انك تشتغلى ..

عايدة : حايبقى عندنا بيت صغير وأولاد صغيرين .. ؟

طارق : أولاد صغيرين دى مضمونة .. بيت صغير حلم بعيد قوى ..

عايدة : عارف يا طارق وأنا معاك باحس بايه .. باحس انى انسانة
.. تفتكر اليوم ده حاييجى يا طارق .. ان الست فى بلدنا
تحس انها انسانة ..

طارق : حاييجى غصب عن الكل ..

عايدة : النهاردة سمعت عمى يقول لمراته يا حرمة ، من الحرام ..
تصور .. الست حرام .. يعنى أنا حرام ..

طارق : حبيبتي انتى حلال جدا .. وحرام عليكى تقولى كلام من
النوع ده .. ما تشغليش بالك بالمسائل دى .. أنا يهمنى تذاكرى

.. وتنجحى .. من حسن حظك ان أبوكى راجل متحضر ،
بيعاملك زى أخوكى بالضبط ..

عايدة : ده مجتمع رجاله بس .. نص مجتمع يعنى .. رجالة
خافين من وش المرأة .. من صوتها .. من عنيتها .. من
جسمها .. من وجودها نفسه .. يبقوا رجالة .. (تتردد)
.. أقول والا تزعل ؟ ..

طارق : اوعى تقولى الكلام ده فى المدرسة .. ليرفدوكى .. الجراة
الزيادة حماقة ..

عايدة : كل البنات بتقوله فى المدرسة .. لو سمعت مغامراتهم واللى
بيعملوه فى الصيف فى لندن وباريس .. شعرك يشيب ..

طارق : سيبك من القضايا الكبيرة دى .. طمنينى .. عاملة ايه
فى الرياضة .. ؟

عايدة : زفت .. الست الى بتدينا الرياضة مافهمش منها حاجة
ست فى منتهى القسوة .. كل يوم تجيلنا عينها وارمة ،
راسها مبطوحة ، علامات زرقا على دراعاتها .. الى بيحصل
لها من جوزها .. بتعكسه علينا .. ضربتنى امبارح خمستاشر
عصاية ..

طارق : ضربتك فىن ؟ ..

عايدة : على ايدى ..

(ياخذ كفيها ويقبلهما)

طارق : (ينظر فى ساعته) .. ميعاد المدرسة .. لازم أسلم نفسى
قبل الساعة ثمانية ..

عائدة : حاشوفك الخميس الجاي ؟

طارق : اذا ماتتجبتش ..

عائدة : حاول ماتتجبتش .. لو ماشفتكش الخميس الجاي
حاتجنن ..

طارق : وأنا كمان ..

(تخرج بهدوء ، البروجي يهزف نوبة رجوع في
الوقت الذي تعود فيه الاضياء الى ما كانت عليه)

أحمد : واضح انك بتحبها ..

طارق : أنا باحب كل حاجة في الدنيا .. كل شيء ..

أحمد : يا أخي نفسي أحب الحب الكبير قوى ده .. أى واحدة
باحبها .. يادوب باحبها ربع ساعة بس .. تلت ساعة
بالكثير ..

(صوت موتور سيارة يستعد ، طارق يلقي نظرة
سريعة من خلال المرآة)

طارق : عربية جيب طالعة .. وفيها مجموعة بالسلاح .. فيه
طوارىء الليلة دى ..

أحمد : يبقى الراجل ، الله يرحمه ..

(يدخل سعد وأسامة ، سعد يصعد الى سريره
بكامل ملايمته)

سعد : الليلة دى أنا تعبان جدا .. وعندى خدمة كنجى .. تسيبونى
أنام .. يعنى لا كوتشينة ولا طرقة .. ولا فرقة ..
ولا مزىكة بصوت على ..

أحمد : ماتكلمش الى أقدم منك باللهجة دى ياله ..

سعد : أقدم منى فى ايه ياخويا .. احنا دفعة واحدة ..

أحمد : اسمى قبل اسمك ..

أسامة : أنا كمان داخل أنام .. لو قلقت ، حانزل فيكم ضرب ..
شوفوا لنا سيجارة ..

(أحمد يقطع سيجارة نصفين ويتقاسمها معه)

سعد : (ينتبه فجأة وهو فوق سرير) .. الليلة دى حصل حاجة
غريبة قوى .. عربية شيفروليه كبيرة .. طافية كل الأنوار
.. وحت وقفت جنب السور الغربى .. ونزل منها واحد
خواجة ومعا شنطة سمسونات ..

أحمد : شكله ايه .. ؟

سعد : منزل البرنيطة على وشه .. وراح داخل على المكتب ..

خليل : غريبة .. نفس الحكاية حصلت جنب السور القبلى ..
عربية رولز رويس كبيرة .. منورة النور الصغير .. جت
وقفت جنب السور .. ونزل منها واحد خواجة ومعا شنطة
سمسونات .. وراح داخل على المكاتب ..

(صوت موتور سيارة ، أحمد يلقى نظرة سريعة
من خلال النافذة)

أحمد : يبقى أكيد الراجل مات .. وفيه طواريء الليلة دي ..
عربية جيب ثانية وفيها مجموعة بالسلاح ..

خليل : (يقف) .. عن اذنكم .. حاروح أنام .. أوضتكم دي
تعلم الفساد ..

طارق : ليه .. ؟ الكوتشينية حاتطلع دلوقت .. والسبخان حايظهر
.. والشاى حايطلع .. والقعدة حاتحلو ..

خليل : لا ياخويا .. انت عاوزنى أنام فى الخدمة والا ايه ..

(يخرج من الكالوس الآخر ، مرسى يدخل ، يقطع
المسرح فى طريقه للخروج .. يستوقفه طارق)

طارق : أهلا يا أبو الأمراس .. استنى رايع فىن ؟

مرسى : رايع أنام .. عاوزين تودونا فى داهية والا ايه .. ؟ ..
خلاص .. بطلت كوتشينية ..

طارق : تعالى أقعد .. (يعطيه سيجارة) .. دخن السيجارة دي

وروح نام .. لسه ماضربتش نوم .. الى ضربت من شوية
دي .. نوبة رجوع ..

(مرسى يجلس على أحد الأسرة ويشعل السيجارة)
.. يركن سلاحه بجواره ، من الطبيعى أن الطلبة
الذين كانوا فى نوبات حراسة معهم بنادق)

طارق : انت كنت خدمة على السور الشرقى ؟

مرسى : أيوه ..

طارق : ماحصلش حاجة غريبة وانت واقف ؟

مرسى : آه حصل .. التلات أتوبيسات بتوع المدرسة طلعوأ ..

طارق : طلعوأ فاضيين .. مش كده .. ؟

مرسى : أيوه ..

طارق : ماحصلش حاجة تانى ؟

مرسى : لا ..

طارق : لا ازاي يا مسطول .. يعنى مافيش عربية جت ووقفت
جنب السور الشرقى ؟

مرسى : آه .. آه .. فيه عربية سودة فخمة .. جت ووقفت جنب
السور ..

طارق : ماركتها ايه ؟

مرسى : ماعرفش ..

أحمد : مع انك غاوى عربيات .. وبتقول لنا على كل الماركات الى
فى الدنيا ..

مرسى : شكلها غريب فعلا .. بس فخمة ..

طارق : نزل منها واحد خواجه .. سمين شوية كده ..

مرسى : فعلا .. انت شفته .. ؟

طارق : لا .. وماكانش شايل فى ايده حاجة ..

مرسى : صح .. وايده كانت فاضية ..

طارق : وخطوته عسكرية شوية ..

مرسى : فعلا ..

طارق : وراح داخل على المكاتب على طول ، من غير ما يبص يمينه
ولا شماله ..

مرسى : ده اللى حصل .. ليه ؟

طارق : لا .. ولا حاجة .. قوم نام انت ..

(مرسى يدخل الى الغرفة الأخرى ، فى نفس
اللحظة التى نستمع فيها الى صوت دوران موتور
وانطلاق سيارة ، أحمد يتابعه بنظره من النافذة
.. يدخل حسن أبو جراب فى طريقه لغرفته)

حسن : سلام عليكم ..

طارق : أهلا يا أبو على .. ماتقعد تاخد شاي ..

حسن : أقعد آخد شاي ..

طارق : انت كان عندك خدمة على السلاحليك ..

حسن : أيوه .. بس ماوقفتش ، حضرة الضابط المشرف غيرنى ..
ووقف طالب من بتوع سنة تانية ..

طارق : أمال كنت فىن ؟

حسن : كنت فى الميز باتفرج على التليفزيون ..

طارق : وانت جاي من الميز ، مريت طبعا على سنة رابعة وتالته
وتانية ..

حسن : آیوه ..

طارق : مین فیهم لابس طواریء .. ؟

حسن : کلهم ..

طارق : لیه .. ؟

حسن : ماعرفش .. أنا سألت واحد من بتوع سنة رابعة ..
عمل نفسه مش سامعنى .. واد من سنة تالته ، قال لى
اتكل على الله .. واد من سنة تانية شحط فى ..

طارق : طب روح نام ..

حسن : آمال فین الشای ؟

طارق : شای ایه یا مجنون .. احنا عندنا شای هنا .. ؟ ..
(یعنیه) .. احنا فاتحینھا قهوة ؟ ..

حسن : (ساخطا) .. الله .. مش انت اللى قلت لى أقعد خد
شای ؟

طارق : الله .. ده بيقول لى الله ..

أحمد : عامله میرى أحسن ..

طارق : (بانفعال غاضب ينقصه الصدق) .. أقف انتباه وانت
بتكلم حکمدارك .. (حسن يتلکأ فیصیح فیہ) .. للخلف
رد .. على أؤختك .. سريعا مارش ..

(حسن یتجرى داخلا غرفته .. قبل أن یتخرج)

يلتفت لطارق) ..

حسن : نفسي أقابل حده في المدرسة دي مايشخطش سي ..

(يشرح)

أحمد : طلعت بايه يا شرلوك يا هولمز .. الراجل الملك مات ..
مش كله ؟

طارق : راجل مين الي مات يا أهبل .. الراجل ميت من أسبوع ..
حاطينه في الانعاش وهو صلين جسمه بقلب صناعي وكلية
صناعية ورثة صناعي .. كله صناعي .. بس يعتبر ميت
من الجمعة الي فاتت ..

أحمد : أمال ايه الي بيحصل .. ايه العربيات الي وقفت دي ؟
طارق : الشيفروليه الأولانية بتاع السفير الأمريكي .. والرولزرويس
بتاع السفير الانجليزى ..

أحمد : والعربية الي ما نعرفلهاش ماركة ..
طارق : فولجا روسى .. والي جاى بايده فاضية السفير السوفيتى
.. القوى الأعظم نايمة معانا في المدرسة الليلية دي
يا أبو حميد ..

أحمد : يعنى ايه ؟ القوى العظمى حاتعمل انقلاب ثلاثى .. ؟ متفقين
يعنى .. ؟

طارق : لأ .. كل قوة بتشتغل لحسابها .. يعنى ممكن أمريكا تكون
مربطة مع سنة رابعة .. انجلترا مع سنة تالتة .. الاتحاد
السوفيتى مع سنة تانية .. وفيه احتمال تانى وده الأرجح
.. انهم مش مربطين ولا حاجة .. بس مخابراتهم عرفت
فجم يعرضوا خدماتهم .. الشنط السمسونيات دي فيها

الفلوس والنصايح .. هم يسموها نصايح .. بس هي تعليمات طبعاً ..

أحمد : والسفير السوفيتي مش جايب معاه فلوس ليه ؟ .. عاوز يعمل انقلاب شكك ؟

طارق : لا أبداً .. هو جاي الأول يشوف ايه اللي بيحصل على الطبيعة .. ويطلع جرى على السفارة ، يكتب تقرير عاجل ويبعته موسكو بالشفرة .. أو باللاسلكي .. المخابرات الأمريكية طبعاً حاتلتقطه بالقمر الصناعي ، بالقمر الطبيعي بالشمس ، بالهوا .. بالنجوم .. بأى حاجة .. وتروح طباعة منه عشرة آلاف نسخة توزعها على سفاراتها .. التقرير حاوصل الخارجية فى موسكو .. الخارجية حاترفعه لمكتب الحزب .. مكتب الحزب حايقوله لقسم العالم الثالث فى المخابرات .. بعد كده يتحول لادارة الانقلابات .. يترفع لمجلس السوفييت الأعلى .. ينزل تانى لقواعد الحزب .. فى الآخر الورق كله يتحول للخارجية .. الخارجية تاخده القرار ...

أحمد : يكون حصل خمسة وعشرين انقلاب ..

طارق : صح .. يدوروا على السفير السوفيتي عشان يبلغوه القرار .. يلاقوه قاعد فى موسكو .. هو وكل موظفين السفارة بيستنوا بلد ثانية يتعينوا فيها ..

أحمد : والأمريكان .. ؟

طارق : لا .. الأمريكان حاجة ثانية .. جاهزين .. السفير يفتح السمسونايث ... تلاقيها مرصوفة دولارات من فوق الوش .. ويروح قافلها تانى ..

أحمد : وتحت الدولارات ؟

طارق : فراخ .. جينة .. زبدة .. شوكلاته .. مصاصة ..
الله ؟ فين يا سيدى الدبابات .. ؟ جاية حالا .. فى السكة
.. محطوطة فى المينا .. بس لما الكونجرس يوافق .. ويروح
باعث لك شوية رشاشات ومسدسات .. طب عاوز طيارات
... من عيني .. بس صبرك على لما آخذ موافقة الكونجرس
.. ويروح باعث لك شوية عربيات .. فى الآخر تصرخ بقى
.. الحقونا بحاجة المسألة حايبقى شكلها وحش .. يروح
باعث لك شوية من الكونجرس بيتسموا لك ...

أحمد : يعنى ايه .. مفيش أمل فى الاتنين ..

طارق : لازم يبقى عندك أمل فى نفسك .. قبل ما يبقى عندك أمل
فى حد ..

أحمد : آه .. أمل فى نفسى .. جينا للجد .. احنا حايكون
دورنا ايه ؟ ..

طارق : فى ايه ؟ ..

أحمد : فى اللى بيحصل ده كله .. ؟

طارق : ولا حاجة ..

أحمد : يعنى حانطلع من المولد بلا حمص ؟

طارق : طبعا ..

أحمد : (تفلت أعصابه) .. نعم .. ده بعدهم .. والله العظيم
أروح فيهم السجن .. هم العيال بتوع سنة رابعة والا تالتة
ولا تانية أجدع مننا .. ؟

طارق : وطنى صوتك يا مجنون ..

أحمد : أوطى صوتى ؟ .. دول بيقتضوا على أحلامى .. بيدمروا
مستقبلى .. أستنى أنا بقى مائة سنة لحد ما بيعجى النور على
وأعمل الانقلاب بتاعى ..

(يرتدى ملابسه بسرعة)

طارق : حاتعمل ايه يا مجنون ؟

أحمد : فيها لاخفيها .. حاتخرج أشوف لى قوة عظمى من دول أتفاهم
معاها ..

(طارق ينهض ليمنعه فى حزم من تكلمة ارتداء
ملابسه)

طارق : اسمع يا انسان يا أهبل انت .. المسائل مش عبط ..
ومش هزاز .. المسألة جد .. وخطر كمان .. ممكن يقتلوك
ويقتلونى .. اعقل ، البس بيجامتك ونام .. وعدى الليلة
دى على خير .. فيه احتمال ينزلوا ضرب فى بعض .. خلىنا
بعيد احنا ..

(يقاومه)

أحمد : سيبنى يا طارق .. سيبنى أرجوك .. لازم ألحق حاجة ..

طارق : حاتلحق ايه بس يا معتوه .. ؟

أحمد : أى حاجة .. انشا الله حتى وزير أوقاف .. شئون
اجتماعية .. شباب .. أى حاجة من دى ..

(فجأة يتوقف ويهدأ قليلا .. يبدو أنه عرف
الحصل)

أحمد : بس .. لقيتها ..

(يتجه نحو الكالوس الذى يؤدى للغرفة الأخرى)

أحمد : (صائحا) .. خليل .. حسن .. مرسى .. أسامة ..
اصحى انت وهو .. اجمعوا عندى بسرعة ..

(يعود طارق)

أحمد : طارق .. لازم نسرق الانقلاب ده .. احنا الى حانعله احنا
الى حانقوم بيه ...

طارق : (يشرح) .. ازاي ؟ ..

أحمد : أنا ماعرفش ازاي ... لكن انت تعرف ..

(لحظات ، طارق يهز رأسه بشدة وكأنه يبعد
الفكرة من رأسه)

طارق : اطلع من نافوخي .. ابعده عنى ..

أحمد : اوزنها فى مخك .. واسخن .. واسخن يا طارق .. اصحى
معايا ... أنا عارف ان الفكرة بدأت تدخل عقلك .. وعقلك
بدأ يشتغل فيها ..

طارق : ابعده عنى يا أحمد يا تعيلب .. أنا مش قد الحاجات دي ..

أحمد : خايف .. ؟ انت عمرك ما كنت جبان .. خد قرار بسرعة
يا طارق .. مفيش وقت ..

(يدخل خليل وحسن ومرسي واسامة يغالبنون
النعاس)

مرسي : فيه ايه .. حصل حاجة ؟

أحمد : فوق انت وهو .. فيه انقلاب حا يحصل الليلة دي .. واحنا
الى حانعله .. وحانعله حلو قوى ..

خليل : حانعله ازاي ؟

أحمد : طارق الرئيس هو الى حايفكر لنا .. هو الى حا يحط الخطة
وحانشكل مجلس قيادة الثورة دلوقت ..

حسن : (يتنأب) .. ومين حا يبقى الرئيس بتاعنا ..

أحمد : أنا طبعا ..

اسامة : انت حا بتنديها ديكتاتورية .. ؟ تقول لي أنا طبعا .. الرئيس
بتاعنا لازم يكون منتخب ..

أحمد : مفيش وقت للديموقراطية ..

اسامة : (وهو ينهض في طريقه لغرفته) .. بلاش .. أروح أنا ..

(أحمد يمنع من الخروج)

أحمد : طب تعالى .. ماتزعلش ..

خليل : يا جماعة .. ديموقراطية ، ديكتاتورية .. الوضع الطبيعي
ان طارق هو الى حايفكر .. وهو الى حايط الخطه ..
واحنا كلنا بنثق فيه .. فيه حد عنده اعتراض ان طارق
يبقى الزعيم ؟

(الجميع يردون ماعدا أحمد)

الجميع : لا ..

أحمد : أنا ماعنديش مانع .. طارق ، أنا .. احنا اخوات ..
حسن : (يتشاءب) .. طب أنا عاوز أناام دلوقت .. ممكن نعمله
بكره الصبح .. ؟

أحمد : (ينهره بشدة) .. اتنيل اسكت .. قوم اغسل وشك
عشان تفوق ..

حسن : (يهمس جانبا) .. لازم يشخط في ..

(يدخل غرفته)

طارق : يا جماعة من فضلكم .. كل واحد على سريره .. بلاش
خرف فاضي ..

أحمد : ايه يا طارق يا أخى .. ؟ هو الواحد ما يعرفش يطلب منك
حاجة أبدا ..

(أحمد يذهب لسرير سعد ليوقفه)

أحمد : سعد .. سعد .. قوم ياله .. فيه انقلاب ..

سعد : يا أخى سيبنى أنام .. حرام عليكم ..
أحمد : فيه انقلاب فى البلد .. (ينام مرة أخرى فينهره بعنف)
.. قوم يا ابن الكلب حاتبقى وزير ..

(يجلس ولم يذهب عنه النوم بعد)

سعد : بتقول انقلاب .. ؟ دى بلدنا محتاجة انعدال ..

(يدخل حسن نشطا بعد أن غسل وجهه)

حسن : فقت .. جاهر .. عندى نشاط يعمل انقلابين ثلاثة ..

(يدخل ابراهيم ، يأخذ طريقه الى سريره مكفهر
الوجه)

أحمد : ابراهيم .. حانعمل انقلاب الليلة دى .. تدخل معنا .. ؟

سعد : (يتشأب بشدة ، يعلق بهمس وعفوية) .. آه .. ابراهيم
يدخل بنفرين ..

(أحمد يلقي عليه نظرة غاضبة وهو يصيح فيه)

أحمد : قوم اغسل وشك يا سعد .. عشان تفوق ..

(سعد يأخذ طريقه خارجا من الكالوس)

ابراهيم : من فضلك ابعده عنى ..

(ينهار على سريريه يفشل في منع نفسه من
البكاء فينفجر باكيا)

أحمد : بتعيط ليه ياله .. ؟

طارق : سيبه يا أحمد .. ابعده عنه .. أنا عارف هو بيعيط ليه ..

(ابراهيم ينجح في السيطرة على نفسه ويبكي
بصوت خافت)

أحمد : اسمعوا يا جماعة .. المدير والوكيل والمشرف .. يبدؤوا
ثلاثة انقلابات الليلة دى .. ومعاهم سنة رابعة وثالثة وثانية
ده الموقف باختصار ..

(يدخل سعه يجلس بجوار المجموعة)

أحمد : اسمع يا طارق .. خلص الهزار ، مابقاش الا الجد .. اذا
كان قدر البلد ان العسكريين يحكموها .. يبقى لازم انت الى
تحكم .. لما الانقلاب يخرج من المدرسة دى ، يبقى لازم انت
الى تقوم بيه .. أنا ماضمنش حد تانى .. انت انسان
مثقف وقارىء .. وعندك مبادئ .. وبتحب بلدك .. وأذكر
من المدير والمشرف .. واحنا أكثر طهارة من سنة تانية وثالثة
ورابعة .. احنا كنا لسه مدنيين من أربعة شهور .. يعنى
حايبقى فينا مزايا الحكم المدني .. والحكم العسكرى ..
هم خلاص بقوا عسكريين .. الأهم من كده
يا طارق ، ممكن يكونوا بيشتغلوا لحساب جهة أجنبية ..
احنا لا .. احنا حانشتغل لحساب بلدنا .. طارق اذا كنت

بتحب بلدك صحيح .. تقدم ، لانتقادها .. أنا عن نفسي
نسيت كل أحلامي .. وبافكر فى حاجة واحدة وبس .. البلد
.. أنا متأكد انك لو خطبتها فى مخك .. حاترسم خطة
ناجحة مايه فى المايه .. طارق قلت ايه ؟ الوقت بيجرى ،
قلت ايه يا طارق ؟

(لحظات صمت ، صوت طلقى بندقية متتابعتين
.. سعد ينظر من النافذة)

سعد : (ببطء وحزن) .. ولد من سنة ثانية .. وولد من سنة
تالته .. مرمين على الأرض بينزفوا ..

(يبعد عن النافذة وهو يشعر بتقلص فى معدته ،
يجلس على سريره وهو يحاول السيطرة على
شعوره بالغثيان)

سعد : بدأوا بالدم .. مش حايثوقفوا ..
طارق : ده الى كنت خايف منه ..

(طلقة بندقية أخرى .. يتحركون صوب
النافذة)

طارق : (يصرخ فيهم) .. ابعد عن الشباك انت وهو ..

(يبدو أن طارق يتعرض لاجهاد عصبى عنيف ..
الكل ينظرون له فى ترقب ولهفة .. صوت طلقة
أخرى)

أحمد : فيه اشتباك دموى حايحصل جوه المدرسة يا طارق .. واحنا
ممکن نموت فيه .. أرجوك فكر .. على الأقل انقذ حياتنا ..
(صوت طلقة أخرى .. طارق فجأة يتوقف)
وينظر للمجموعة ويصيح فيهم بلهجة أمرة)

طارق : اجمع ..



(يتجمعون في صف واحد بنشاط)

طارق : (لهجته الآن ونظراته شيء مختلف تماما عن طارق الذي
عرفناه في الجزء السابق من المسرحية) .. السادة .. أعضاء
مجلس قيادة الثورة .. صفا .. انتباه .. احنا حانعمل
دلوقت أهم وأسهل ثورة عسكرية في التاريخ .. كل الخطوات
والعمليات التمهيدية للثورة ، اتعملت خلاص .. من حسن
حظنا أن اللى قام بيها غيرنا .. مجموعة الأشخاص
المسؤولين المطلوب القبض عليهم .. خلاص اتقبض عليهم ..
فيه مجموعات مسلحة طلعت وزمانها قبضت عليهم .. في
الغالب ، حايحبسوهم هنا في المدرسة .

(أصوات مواير سيارات ، يلقى نظرة سريعة من

خلال النافذة)

طارق : قبضوا عليهم وجابوهم فعلا .. التلات أتوبيسات مليونين
.. البلد دلوقت مافيهاش مسئول واحد في بيته أو على مكتبه
.. القوى المتصارعة داخل المدرسة .. حاتشتبك مع بعض
.. وحايكون اشتباك دموى زى ما قال أحمد .

أحمد : أنا من رأيي ..

طارق : (فى غضب شديد) .. ثابت .. ولا كلمة .. أنا المسئول
وأنا الى بافكر .. وأنا الى باتكلم ..

أحمد : (يعتذر فى ضعف) .. أنا آسف يافندم ..

طارق : (يواصل) .. فيه احتمال أن القوى المتصارعة تخلص على
بعض ، فى الحالة دى احنا حانتحرك بلا عقبات .. لكن أنا
فى تصورى أن سنة رابعة بحكم تدريبها وخبرتها ، حاتنجح
فى القضاء على الثالثة وتانية .. بس حاتطلع من المعركة ضعيفة
جدا .. قبل مايلموا صفوفهم ويرتبوا أنفسهم .. حانكون
احنا اشتغلنا .. احنا حانتحرك بمجرد الاشتباكات مانتوقف
.. أول حاجة حانعملها ، نقبض على المدير والوكيل والمشرف
.. أحمد ..

أحمد : أفندم ..

طارق : انت المسئول عن كده .. المشرف والوكيل يتحبسوا فى
العنبر ده (يشير للكالوس) .. المدير تجيبوهولى هنا ..
مش عاوزه يغيب عن عينى لحد الثورة مانتجح ..

أحمد : حاضر يا أفندم ..

طارق : أسامة ..

أسامة : أفندم ..

طارق : حاتطلع على المكاتب .. تجيب لى آلة كاتبة .. وماكينه
استنسل .. وختم المدرسة ..

أسامة : حاضر يافندم ..

طارق : خليل ..

خليل : أفندم ...

طارق : حانتط من السور دلوقتى .. وتطلع على مبنى الاذاعة والتليفزيون .. تجيب لى أكبر موظف سهران هناك والدرجة المالية بتاعته .. وبعدين تطلع على الداخلية .. تجيب لى اسم ورتبة أكبر مسئول نوبتجى .. علشان أطلع لهم القرارات ..

خليل : قرارات فصل يافندم ؟

طارق : ترقية .. حاخليهم وزراء .. وبالطريقة دى يبقى ضمنا الاعلام والأمن .. وهم دول الجناحين بتوع أى دولة عصرية .. عاوزك لما تقابلهم تفهمهم اننا مسكنا البلد خلاص .. مش لسه حانمسكها .. لو عرفوا اننا لسه حانمسكها حايقبضوا عليك .. ماتطلعش مكاتبهم ، أقف تحت فى الاستعلامات واندع لهم بالتليفون ، حاينزلوا لك على طول .. يالله .. ربنا معاك ..

(خليل يخرج من الصف ، يؤدى التحية ويندفع خارجا)

بقيت أهم نقطة .. وهى البداية الحقيقية للثورة .. اذاعة البيان رقم واحد .. طبعا المشرف والوكيل كتبوا ثلاث بيانات .. ولحسن حظنا ولفرط غباثتهم .. أدوها لشخص واحد ..

(تتجه أنظار الجميع لابراهيم الذى يرتفع صوت تحييه .. ينهض من على سريره ببطء ويخرج البيانات الثلاثة وقد وضع كل واحد فى جيب ، يعطيها لطارق الذى يمزقها)

ابراهيم : (يرفع رأسه لأعلى) سامحنى يا رب .. هم الى ارغمونى
على كشف السر .. وخذلوا منى البيانات بالقوة ..

طارق : طبعاً حلفوك على المصحف والمسدس انك تكتم السر ..

ابراهيم : (بتعاسة) أيوه .. بس انتم هجتموا على وخذتوا منى
البيانات ، تحت تهديد السلاح ..

طارق : لما يحاكمونا ، حاشهد معاك بكده ولا يهملك .. ؟
أنا بقى حاديلك البيان بتاعنا من غير ما أحلفك .. (بلهجة
ودية) أقف فى الصف جنب اخواتك ..

(ابراهيم مترودد)

طارق : أقف فى الصف ، ماتحيرش المؤرخين .. حايقولوا كان
معاهم ، وماكانش معاهم .. (لم يحسم الأمر بعد)
يا عزيزى ابراهيم ، احنا قدرنا نموت الليلة دى ، يا حانموت
فى الاشتباك ، يا حانموت لما ننكشف .. واذا عشنا .. يبقى
حانعرف نخدم بلدنا .. (بصرامة) .. اجمع فى الطابور ..
(ابراهيم ينضم لهم بسرعة)

طارق : كلمة أخيرة .. مفيش طلقة رصاص واحدة حاتضرب ..
ولا حانستعمل السلاح الأبيض .. البنادق الى حانستخدمها
.. كلها حاتكون مش متممرة ..

(فجأة نستمع لدفعات مدافع رشاشة ، وطلقات
بنادق وانفجارات)

طارق : (صارخا) .. أرقد ..

(انظام .. الضرب مستمر مع الانظام الذى
يستمر حوالى عشرين ثانية ، يتوقف كل شيء ..
ظهور تدريجى للاضاءة)

المشهد الثالث

(عند ظهور الاضاءة نجد طارق وحده على المسرح ،
هادئا تماما . أو لعله يحس بنوع من اليأس
المرح أسلمه لحالة من اللامبالاة . يمسك بيده
أوراق كوتشينة يعيد ترتيب أوراقها فى هدوء .
منضدة صغيرة فى منتصف الحجرة تماما . . . يأتى
بكرسى ويضعه أمامها . . . يأتى بجهاز راديو صغير
ويضعه على حافة المنضدة . . . ينظر فى ساعته ثم
يفتح جهاز الراديو . . . نستمتع الى صوت محطة
مغلقة . . . يغلق الراديو مرة أخرى . . . يجلس
.. يوزع أوراق الكوتشينة على نفسه وعلى لاعب
وهى يجلس أمامه . . . يبدأ فى اللعب . . . حسن
ومرسى يدخلان بالوكيل)

الوكيل : (بصوت مختنق) .. كده يا طارق .. ؟ ودينى لنا قايل
لأبوك ..

(طارق يشير لهم أن يقتاداه للداخل)

الوكيل : (وهو يحاول المقاومة) .. عيب يا طارق ، ده أبوك
صاحبى ..

(يخنفان به ، مرسى يعود)

مرسى : تصور .. الطحن ده كله .. ولا واحد مات .. انما
الاصابات كثير جدا ..

(طارق لا يرد .. منهمك في اللعب تماما ...
يدخل أحمد وسعد وأمامهما المدير .. لا يجب
أن يقتاداه بشكل مهين)

طارق : اتفضل يا قندم ..

طارق : المشرف فين ؟

أحمد : مش لاقيينه ..

طارق : (يقفز من مكانه وقد طاش صوابه) .. مش لاقيينه ؟ ..
لو خرج من المدرسة حاييوظ كل حاجة .. لازم تلاقوه فورا ..

(يتوتر ، لا يدري ماذا يفعل .. وفجأة يسرع
للنافذة ويفتحها)

طارق : (صائحا بأعلى صوته) .. ثابت ..

(يأتي صوت المشرف من بعيد)

المشرف : ولا حركة ..

طارق : في الجراش .. هاتوهولي ..

(يخرجان مسرعين ، يجلس مرة أخرى الى
المنضدة ، يلقي بورقة وهو يشعر بالانتصار ..
يدخل أحمد وسعد بالمشرف يقتادانه بسرعة
عبر المسرح ويختفيان به في الكالوس الثاني ،
يستولى طارق على كل الأوراق)

طارق : أحمد .. اتصل بالمستشفيات .. وخليك مع المصابين وقدم
لى تقرير ..

(أحمد يؤدى التحية ويخرج مسرعا ، طارق يلهم
الكوتشينة ويضع أوراق اللعب جانبا)

المدير : الدور لسه مانتهاش ..

طارق : الدور انتهى .. والعشرة خلصت .. وأنا الى خدتها ..

المدير : لأنك بتلعب لوحداك .. أو متصور انك بتلعب لوحداك ..

طارق : لو لعبت مع أى حد .. أنا الى حاكسب .. تحب تجرب ..

(المدير ينهض ، يستحب كرسيه ويجلس أمامه ،
مرسى يقف الآن انتباه فى طرف المسرح . وطارق
يرتب أوراق الكوتشينة بسرعة)

طارق : (يوجه حديثه لمرسى) .. العصفور وصل العش ؟

مرسى : وصل ياغندم ..

طارق : المهم يغنى على طول ..

مرسى : حايحصل ياغندم ..

(يوزع الأوراق)

المدير : حانلعب على ايه .. ؟

طارق : على الحاجة الى طول عمركم بتلعبوا عليها ..

المدير : والى يخسر ..

طارق : رقبته حاتطير بكره الصبح .. رقبته ورقبة الى خلفوه ..

(اللعب مستمر .. المدير ورقه سيىء)

المدير : انتم قد الحكاية دى ؟

طارق : نجرب .. انتم بتحكموا من آلاف السنين ..

المدير : احنا مين ؟

طارق : الكبار .. كانت النتيجة ايه .. ؟ .. تعاسة وغلب فى كل
حقة وكل مكان .. ادونا فرصة .. وسعوا لنا شوية جنبكم
.. يمكن نعرف نعمل حاجة ..

المدير : كل الى حاتعملوه انكم تزودوا تعاسة الناس وغلبها ..

طارق : مش ممكن .. دى مسألة عاوزه خبرة .. واحنا ماعندناش
خبرة من أى نوع ..

(يفتح الراديو ، المارشات ، يتوقف المارش
ونستمع للمذيع)

المذيع : أيها السادة .. بعد قليل نذيع عليكم بيانا هاما ..

(يعود المارش ، طارق يخفض الصوت)

المدير : (بحزم) .. طارق ، أنا باديلك فرصة دقيقتين .. تعتذر
لى عن الى انت عملته وتكتب استرحام وتروح تحط نفسك
فى الكراكون انت وزمايلك ..

طارق : العب ..

المدير : البلد فى فى ايدي ..

طارق : البلد فى ايد الشخص الى البيان حايتماد باسمه ..
العب ..

المدير : البيان حايتماد باسمى ..

طارق : البيان بتاعك اتقطع من شوية .. العب .. خلص الدور
وانتهى اللعب ..

(تتوقف المارشات ، طارق يرفع الصوت ، نستمع
للمذيع)

المذيع : أيها السادة .. بعد لحظات نذيع عليكم بيانا هاما من طلبة
السنة الأولى بالمدرسة الثانوية العسكرية ..

(تعود المارشات ، كالمذهول يقف المدير ويهد
يده لرتبه العسكرية، ينزعها ثم يؤدى التحية
العسكرية لطارق الذى يقف مشدود القامة ..
ببطء شديد تنحفت الاضائة .. وتنزل ..)

الستار

الفصل الثاني

Rem₁, Rem₂,

المشهد الأول

(مكتب طارق .. شرفة متسعة في صدر المسرح
تطل على ميدان .. منضمة اجتماعات نصف
دائرية .. لوحة كبيرة عليها شعار .. (السعادة
لكل مواطن) .. طارق يطالع بعض الأوراق ،
وجهه متجه قليلا .. يرتدى ثيابا عسكرية
زاهية .. أكبر عدد ممكن من أجهزة التليفون
بأشكالها المختلفة .. يرد على مكالمات عديدة
باجابات مقتضبة .. مثال (موافق) .. (لا)
.. (كويس) .. (لسه بدرى على الحكاية
دى) .. (حدد له ميعاد) .. (مش عاوزه)
.. (حط نفسك فى السجن) .. يدخل المشرف
على مكتبه .. هو نفسه مشرف المدرسة .. يحمل
أوراقا ، يضعها أمامه ويقف بأدب .. طارق يوقع
على الأوراق .. يخرج المشرف .. يعود طارق للرد
على التليفونات .. يدخل مدير المكتب ومعه
أوراق .. هو نفسه مدير المدرسة السابق ..
يقف بأدب وثبات الى أن ينتهى طارق من التوقيع
.. يخرج ، طارق يعود للرد على التليفونات ،
يضغط على أحد الأزرار .. يدخل المشرف)

طارق : أنا طالب حضرة الضابط الوكيل ، قصدى وكيل المكتب ..

المشرف : وصل اليونان يافتندم ..

طارق : اليونان ؟ ..

طارق : حايعمل ايه فى اليونان ؟

المشرف : مأمورية خاصة .. ويبدو أنها شديدة الأهمية .. الطائرة كانت طالعة الكويت .. سيادة الوكيل استدعاهما من الجو .. ونزل الركاب .. وخذ الطائرة ، وطلع على اليونان ..

طارق : فعلا تبقى مأمورية هامة .. بس أنا ماعرفش عنها حاجة .. (لحظة) .. فيه احتمال يكون هرب ؟ ..

المشرف : أنا متأكد يافندم أنه ماهربش ..

طارق : ليه متأكد ؟ ..

المشرف : غداه هنا .. (طارق ينظر له فى برود) .. وأسرتة هنا .. وماكانش معاه شنط لما سافر ..

طارق : ابعتهولى بمجرد ما يوصل ..

المشرف : حاضر يافندم ..

طارق : مواعيدى ايه النهارده ؟ ..

المشرف : (يقرأ من ورقة صغيرة) .. عشرة ونص الاجتماع مجلس القيادة .. حذاشر لقاء مع خير السلاح .. حذاشر وربع لقاء مع خير الأمن .. متوقع أن المسيرة توصل الساعة اتناشر .. حاتخرج سيادتك تحييم وتقول كلمة قصيرة ..

طارق : المسيرة دى جايه منين ؟ ..

المشرف : من كل أنحاء البلاد ..

طارق : مين الى عاملها ..

المشرف : الشعب ..

طارق : فاهم .. مين يعنى الى منظمها ؟

المشرف : معلوماتي يافندم ان الشعب هو الى منظمها .. (طارق يعاود النظر له ببرود) .. بس الشعب استعان ببعض أعضاء مجلس القيادة ..

طارق : هو ده اللي أنا عاوز أعرفه .. مين ؟

المشرف : السادة .. سعد السياف .. مرسى محمد أحمد .. أسامة الزهار ... خليل الجمال ..

(يشير له بحركة خفيفة .. يخرج المشرف .. طارق يضغط زرا .. يدخل مدير المكتب يحمل دوسيتها)

المدير : أفندم ..

طارق : الوكيل سافر اليونان النهارده .. بدون ما يستأذن .. سفريه مريبة وتبعث على الشك .. عاوزك تبعث وراه مجموعة .. تدور عليه فى أوروبا كلها .. وتجيبهولى ..

المدير : فى صندوق يافندم ؟

طارق : صندوق ؟ ايه حكاية الصندوق دى ؟

المدير : ده نظام عامله هو شخصيا .. ساعات فيه ناس لازم نجيبهم من أوروبا بسرعة .. مايقاش فيه أماكن فاضية فى الطيران .. لكن العفش دايما فيه مكان .. ولذلك بنجيبهم

فى الشحن .. فى صندوق ، وتذكرة الطيران فى الشحن
كمان بتبقى أرخص ..

طارق شكله ايه الصندوق ده .. ؟

المدير : شكله ظريف قوى .. من بره صندوق .. ومن جوه متنجد
على قد جسم الشخص المطلوب بالمللى .. الوكيل بيحب مقاس
الشخص المطلوب من الترزى بتاعه ..

طارق : طبعا مش عامل صندوق لنفسه ..

المدير : لا طبعا .. بس أنا عامل له .. كنت عامل حساب حاجة
زى كده ...

(يدخل الوكيل مسرعا وهو يلهث)

الوكيل : حضرتك عاوزنى يافندم ؟

طارق : (معنفا) .. كنت فىن يا سيد ؟

الوكيل : كنت فى اليونان يافندم ..

طارق : بتعمل ايه فى اليونان يافندم ؟

(يتردد ويبدأ فى الارتعاش تحت تأثير نظرات
طارق الغاضبة)

طارق : رد ماتضطرنش ألجأ لأساليب أخرى .. (يصرخ فيه) ..
كنت بتعمل ايه فى اليونان ؟

الوكيل : كنت باجيب زيتون أسود ..

طارق : (مصعوقا من الدهشة) .. زيتون أسود ؟

الوكيل : حضرتك طلبت امبارح زيتون أسود على الفطار ..

طارق : وجبت لى زيتون أسود على الفطار ، ومستورد كمان ..

الوكيل : أيوه يافندم .. طليانى .. لكن لاحظت انك بتاكل باستياء .. أو ما كنتش مبسوط منه .. خطفت رجلى لحد اليونان .. لقيت زيتون كويس .. كالاماتا .. عظيم ، حاتاكل صوابك وراه ..

(طارق يطرق برأسه فى اكتئاب ثم يكلمه بصوت مختنق ، وكأنه على وشك أن يبكى)

طارق : حاتنهد الدنيا لو ما كنتش زيتون أسود كويس ..

الوكيل : لو كلت حاجة مش عاجباك ممكن تتعكنن .. ولما تتعكنن ممكن تاخذ قرار خاطئ فى أى مشكلة ..

(ينظر للمدير مستمعا)

المدير : ولو اتخدت أى قرار خاطئ فى أى مشكلة ، ممكن الدنيا تنهد فعلا ..

الوكيل : المسألة بسيطة ..

طارق : وجبت الزيتون ؟

الوكيل : جيبته يافندم .. تحب تدوق ..

طارق : لا .. كله انت .. مش حاكل زيتون ..

الوكيل : زعلت يافندم ؟

طارق : لا .. مازعلتش .. مش فيه ناس بتبطل التدخين ؟ ..
أنا بطلت الزيتون .. اتفضل ..

(الوكيل يخرج .. طارق يعود لمكتبه .. المدير
يعرض عليه البوستة)

المدير : تلغرافات تأييد من كل أنحاء البلاد .. من كل نقابات
العمال .. نقابة عمال الحديد والصلب .. الغزل والنسيج
.. الصناعات الثقيلة .. تعمير الصحارى ..

طارق : استنى استنى .. فيه فى بلادنا صناعة حديد وصلب ؟ ..
ونسيج .. وصناعات ثقيلة .. أول مرة أسمع عن
النقابات دى ..

المدير : اتعملت الجمعية دى يافندم .. (يمد يده بورقة أخرى) ..
برقية تأييد من اتحاد عمال الغابات ..

طارق : عمال الغابات فين ؟ .. فى فنلندا ؟

المدير : لا عندنا ..

طارق : هى بلدنا فيها خمس شجرات على بعض .. ؟

المدير : ماهو علشان كده حانعمل غابات .. والبرقية من اتحاد
العمال الى ناوى يعمل الغابات دى .. ماتدقش يافندم .. دى
حاجات معمولة من أجل العالم الخارجى .. أmaal نقول للعالم
الخارجى ايه .. ؟

طارق : (بسخرية شديدة) .. عندك حق .. أصل العالم الخارجى ..
.. أهبل .. عبيط .. بريالة .. الى نقول هو له يصدق ..
.. خواجات بقى ..

المدير : (وكأنه يعتذر) .. على العموم يافندم .. دى تعليمات
السيد أحمد تعيلب ..

طارق : غيره .. ؟

المدير : (يمد يده بتقارير أخرى) .. تقارير من أوروبا الغربية
والشرقية ... وأفريقيا ... ومن البلاد العربية ... كل
رجال العهد البائد .. وكل أفراد مجلس الأعيان البائد ..
عملوا خمسة وعشرين محطة اذاعة ضدنا .. وستين جورنال
وبيجهزوا للغزو ..

طارق : غزو ؟

المدير : أيوه .. متطوعين .. ومأجورين .. ومرتزقة ..

طارق : يتعرض على المجلس .. وتقارير الداخل ؟

المدير : (يعطيه ورقة) .. الشعب كله معنا .. ماعدا شوية طلبة
وعمال ومثقفين ورجال دين .. شيوعيين طبعاً ..

طارق : متأكد انهم شيوعيين ؟

المدير : والله يافندم أنا باستنى توجيهات سيادتك .. لو حطينا
اديننا فى ايد الكتلة الشرقية ، حانقول عليهم رجعيين
وتحريفين .. وعملاء للبورجوازية والامبريالية العالمية .. ولو
حطينا اديننا فى ايد الغرب .. حايبقوا شيوعيين طبعاً ..
ملحدين .. وأعداء الدين .. وفى الحاليتين هم أعداءنا ..

طارق : ولو وقفنا على الحياد .. يبقوا ايه ؟

المدير : يبقوا ولاد كلب .. ومطلوب حماية البلد منهم ..

طارق : قصدك حمايتنا احنا ..

المدير : البلد هي الثورة .. وانتم قمتم بالثورة .. يعنى انتم البلد والبلد هي انتم .. وأى عدو لكم .. يبقى عدو للثورة ..

طارق : والحل ؟

المدير : أهو .. على مكتب سيادتك ..

(يشير لمجلد كبير موضوع على مكتب طارق)

طارق : (يفتح المجلد ويلقى نظرة ثم يصيح منفعلا) .. أمن أمن .. أمن .. أجهزة أمن .. مكاتب أمن فى كل مكان .. وكل جهاز أمن يتعمل عليه جهاز أمن تانى .. وعشان الجهازين ينضبطوا ، أعمل لهم جهاز أمن ثالث .. وهكذا .. كل المشاريع الى متقدمه لى من زملائى .. كلها أمن فى الداخل والخارج .. والميزانيات المتقدمة مخيفة .. عشرات الأصفار .. (يفتح بعض الأوراق) .. الأسلحة المطلوبة غالية جدا .. لو وافقت على الطلبات دى كلها .. البلد حايبقى نصها جيش ونصها مخبرين .. احنا لازم نستفيد من كل أخطاء الحكومات العسكرية فى المنطقة .. لازم نفكر بشكل مختلف ..

المدير : يافندم ده علم .. لايد من جيش قوى .. وأمن قوى ..

طارق : جيش قوى + أمن قوى = شعب ضعيف .. يتم ضربه وتفتيته وتقسيمه فى أول فرصة .. التاريخ قال كده .. أنا مش أجده من هتلر .. والتجربة فى المنطقة بتقول كده ..

المدير : مش فاهم ..

طارق : الناس لازم تحب حياتها .. تعشقها .. كل واحد يحب نهاره وليله .. مفيش حد فى الدنيا .. يجروُ يقرب أو يعتدى على شعب بيحب حياته ومستعد يموت عشانها .. تعالى .. (يأخذه من يده الى الشرفة) .. بص .. شايف ايه ؟

المدير : أرض .. أرض فضاء ..

طارق : تعبير مهند جدا .. اسمها خرابة .. الخرابة دى مغرية جدا لأى حد .. أى عصابة .. أى واحد يفكر يستولى عليها بوضع اليد ، بقضية مزورة .. يعمل عليها غرزة ويقعد فيها وتبقى بتاعته بالتقادم .. ولو وقفت عليها جيوش الدنيا مش حاتعرف تحميها .. لكن لو بنيت فوقها مصنع ، جامعة ، معمل ، لو زرعناها ، مش ممكن حد يقرب منها .. هى دى المسألة باختصار .. لو بلدنا وحياتنا بقت خرابة ، أى حد حايطمع فيها .. أى حد حاينط عليها .. يجيلك لابس عسكري ، لابس سايج ، لابس تاجر ، لابس مستثمر ، لابس سمسار ، لابس مزيكة ، فى النهاية هدفه واضح ومحدد .. الاستيلاء على الخرابة .. أنا بصراحة بقى مش ناوى أعملها خرابة .. أنا حاعمل بلدنا شىء عظيم وجميل ..

المدير : يافندم الرومانسية والأحلام حاجة ، والواقع حاجة تانية ..

طارق : مش أحلام .. الصحرا دى كلها لازم تنزرع وتتصنع .. وكل واحد يحرس غيطه ومصنعه بفاس وبندقية ..

المدير : يافندم أنا باحترم فيك أحلام الشباب وطهارته ، ونقاوته ، وحماسه .. لكن لو استمريت تفكر بالشكل ده .. حاييجوا يدبحوك هنا فى مكتبك ..

طارق : آه .. يعنى كل الاجراءات دى لازم تتعمل عشان أحمى
نفسى ..

المدير : عشان تحمى البلد ..

طارق : (يكاد يصرخ فى انفعال شديد) .. أنا مش البلد .. أنا
طارق ..

(على الفور نستمع لصوت عايذة وهى تنادى
بعصبية وكأنها تستغيث)

صوت عايذة : طارق .. يا طارق ..

طارق : (ينسى وضعه الجديد ويحجب بصوت عال) .. أيوه ..
مين اللى بينده .. ؟ (يستعيد نفسه على الفور ويتكلم بوقار
شديد) .. أيوه يا عايذة .. تعالى ..

(عايذة تدخل مندفعة ، يتلقاها بين ذراعيه ..
مدير المكتب على الفور يؤدي حركة للخلف در
بنشاط زائد .. طارق يشعر بحرج فيبعدها
عنه برقة)

طارق : (للمدير) .. نستكمل نقاشنا بعدين ..

(يخرج المدير)

عايذة : الناس دول تنبه عليهم ، يدخلونى بمجرد ما آجى .. مش
يسيبونى ملطوعة بين السفرا والوزرا .. واللى ..

طارق : (يقطعها مهدئا) .. طب اهدي بس .. اهدي يا حبيبتي .. فيه نظام .. لازم نحترم النظام ..

عايدة : خمستاشر نفر شافوا الكازنيه بتاعى .. وكل واحد يقعدنى على دكة ويأخذ الكرنيه ويغيب نص ساعة .. ويرجع يعتذر لى ويبتسم .. الحكاية دى اتكررت عشر مرات .. وفى الآخر واحد قعد يحقق معايا .. (تقلده بسخرية) .. عاوزاه ليه؟ .. أنا خطيبته .. أيوه يافندم عارف انك خطيبته .. أنا قدامى ورق لازم أملاه .. لابد من كتابة الغرض من الزيارة .. عاوزاه ليه ؟ .. أخيرا اضطريت أقول له وانت مالك يا أخى عاوزاه أحبه شويه ...

طارق : حبيبتي دى اجراءات أمن .. لابد من حماية الثورة ..

عايدة : حمايتها منى أنا ؟ .. دى تبقى ثورة ضعيفة قوى ..

طارق : (يتلفت حوله كما لو كان يخشى أن يسمعها أحد) .. وطى صوتك ..

عايدة : (هامسة) .. هى الحيطان لها ودان كمان ؟

طارق : هنا بقى الودان لها حيطان .. الكلمة بتاعتك دى قالها واحد على قهوة امبارح ..

عايدة : وحصل له ايه ؟

طارق : أبدا .. مش حايقعد على القهوة تانى .. فى الغالب لمدة عشر سنين .. حبيبتي مفيش داعى نتقابل هنا .. لأنهم بيطبقوا التعليمات على أى حد .. انشا الله يكون أبويا ..

عايدة : من يوم ما عملتوا الانقلاب ..

طارق : (مصححا) .. الثورة ..

عايدة : من يوم ما عملتوا (تتردد لحظة وكأنها لا تؤمن بصحة الكلمة
ثم تواصل) .. من يوم ما عملتوا الى عملتوه .. سبعة أيام
دلوقت ومفيش ولا تليفون منك ..

طارق : آسف .. كنت مشغول جدا .. وما اتصلتيش انت ليه ..؟

عايدة : كل ما اتصل ، يحولوني على خمسين سويتش .. وفي
الآخر ألاقبك بتكلم واشنطون .. باريس .. لندن ..
موسكو ..

طارق : معلش .. الفترة الأولانية .. حاتبقى عصبية شوية ..
لكن بعد كده ، حياتنا حاتنتظم .. وحانشوف بعض كثير ..

عايدة : (صوتها بدأ يكتسب رنة حزينة) .. حانشوف بعض
كثير ؟ .. والله أنا خايفة يا طارق .. أنا بدأت أخاف على
علاقتنا .. أكثر من كده ، بدأت أخاف على حياتنا نفسها ..
كل الى كنا بنحلم بيه .. اتهد خلاص ..

طارق : ايه الكلام الى بتقوله ده ؟ .. بقى الأحلام الى كنت
حاحققها وأنا ضابط صغير .. مش حانعرف نحققها وأنا رئيس
دولة ؟ ..

عايدة : طارق أنا أحلامي صغيرة قوى .. وعادة رؤساء الدول
ما يعرفوش يحققوا الأحلام الصغيرة .. (لحظة) .. لما كنت
بتأخر عن المدرسة عشر دقائق .. كانت الناظرة بتستنانني
على الباب ومعها العصاية .. امبارح رحت المدرسة متأخرة
ثلاث حصص ..

طارق : (ضاحكا) .. طبعا لقيتي الناظرة واقفة من غير العصاية ..

عايدة : لقيت وزير المعارف .. وكل المسؤولين فى الوزارة ..
ومندوب اليونسكو .. واقفين صف واحد قدام المدرسة ..
خير يافندم ؟ .. ايه الى أخرك يافندم ؟ .. عسى يكون خير
يافندم ؟ ..

(يكتب للحظة ولكنه يحول الأمر لنكتة)

طارق : ودى حاجة تزعلك ؟ .. ناس مهتمين بيكى ..
عايدة : أهو الاهتمام ده هو الى بدأ يفقدنى طعم حياتى .. كل
ما أخرج من البيت باخرج فى موكب .. موتوسيكلات ..
وحرس .. انت عارف انى بالعب تنس فى نادى شركة
البترو ..

طارق : أيوه .. حد ضايقتك .. ؟

عايدة : لا .. بس كل ما ألعب ، الى قدامى يتغلب لى .. غلبت
كل أبطال النادي .. امبارح دخلت السينما أنا والأسرة ..
لاحظت حاجة غريبة .. بتوع البوفيه يبيعوا ورق دمغة
وطوابع دمغة .. وكل المتفرجين يشتروا منهم وهيصة
وزيطة .. وخناق وضرب ..

طارق : وبعدين .. ؟

عايدة : بمجرد ما السنما نورت فى الاستراحة .. كل المتفرجين
الى فى الصالة والبلكون والألواح .. هجموا على يدونى
شكاوى وعرايظ .. الى انطرد من بيته .. واللى عاوز شقة
.. واللى مظلوم فى الترقية .. واللى عيان وعاوز يتعالج ..
(حزينة) .. يبدو أنى من هنا ورايح .. حاعيش حياة غير
طبيعية .. (لمحات) .. طارق ..

طارق : أم ..

عايدة : ماتعرفش ترجع فى كلامك ؟

طارق : أرجع فى كلامى ؟ .. الثورة ، هى الحاجة الوحيدة فى الدنيا .. الى يعملها ، مايرجعش فى كلامه .. الا فى حالتين .. يموت .. أو حد يرجعه فى كلامه بالقوة .. عايدة ، أرجوكى .. ماتحوليش المسألة لمأساة .. المهم أننا مانتغيرش .. مانحسش أننا فوق البشر .. هو ده المهم .. (يحاول تغيير مجرى الحديث) .. قوليلى يا حلوة .. الست بتاعة الرياضة عاملة فيكى ايه ؟ ..

عايدة : مابتديناش دلوقت .. الوزارة نقلتها على الحدود .. على بعد ألفين وخمسمائة كيلو ..

طارق : (وهو يقوم ليكتب ملحوظة) .. آمال مين الى بيديكى الرياضة ؟ ..

عايدة : الوزير .. بيدى فصلنا بس .. راجل مهذب .. وبافهم منه كويس ... (تقلد الوزير) .. فهمتى يافندم ؟ .. أشرح لك تانى يافندم ؟ .. لو المسألة صعبة عليكى .. بلاش تحليها يافندم .. والحاجة الصعبة بيحذفها من المقرر وهو واقف ..

طارق : جميل .. بيحذفها من المقرر بتاع الفصل ولا المدرسة ؟

عايدة : متهيأ لى من المنهج بتاع الوزارة .. لأنه بيحذف ويروح ماضى على قرار وزارى بال حذف .. وكيل الوزارة بيبقى واقف وراه .. يأخذ القرار ويطلع جرى يطبعه استنسل ..

(يكتب ملحوظة)

عايدة : طارق ..

طارق : أيوه ..

عايدة : أنا جاية أسألك سؤال محدد .. بابا وماما وكل قرابيبي
بيكلموني فى الحكاية دى ..

طارق : حكاية ايه ؟

عايدة : حانتجوز امتى .. ؟

طارق : لما أخرج .. لازم أدخل أكاديمية حكم الشعوب فى جنيف
.. عشان أكون حاكم معترف بيه .. فى الأسرة الدولية لازم
يكون معايا بكالوريوس فى حكم الشعوب ..

عايدة : تضمن لى .. بعد ما تاخد البكالوريوس وترجع .. ماحدثش
يقبض عليك فى المطار ؟

طارق : ماحدثش فى الدنيا بيضمن حاجة .. أنا أعمل الصبح والباقي
على ربنا ..

عايدة : نتجوز وأسافر معاك سويسرا ..

طارق : لا .. لازم تكمل تعليمك .. ماحدثش ضامن الظروف ..
يحصل لى أى حاجة يبقى معاكى شهادتك .. كمان قوانين
وزارة المعارف بتمنع أى بنت انها تتجوز وهى فى المرحلة
الثانوية ..

عايدة : القانون ده اتلغى .. لجنة تطوير القوانين لغته .. الوزير
نده لى فى الفسحة وقال لى الحبر ده .. والمدرسة كلها قالت لى
مبروك ..

(ينهض لكتبه ويكتب ملحوظة)

الدولية سريعة جدا .. ماحدث عارف حايحصل ايه فى الأربع سنين دول ..

طارق : سنة واحدة .. المقرر بتاع حكم الشعوب مضغوط فى سنة واحدة .

عايدة : شكلى كما لو كنت باترجاك تتجوزنى .

طارق : حبيبتى أرجوكى .. ماتقوليش الكلام ده ..

عايدة : (ببطء وحزن) .. طارق .. لأول مرة باشعر بالخوف .. مش المخاوف العادية الى كل الناس بتحسها .. لا ..

طارق : من ايه .. وعلى ايه ؟

عايدة : من كل حاجة .. وعلى كل حاجة .. (يخنق صوتها) .. أنا مش بالومك .. أنا جزء من الماضى .. أو زى الجرايد ماتبقول .. من العهد البائد ... مفيش داعى نخجل من بعض .. ومفيش داعى لمحاولة التهرب منى .. أنا مش حاطاردك .. (تبدأ فى خلع الدبلة) .. مش حاطاردك يا ريس ..

طارق : بتعملى ايه يا عايدة .. ؟

عايدة : ولا حاجة .. (تخلص الدبلة) .. عشان تبقى خفيف وانت بتنطلق بالبلد لقدام .. علاقتنا حاتنقل حركتك .. انت كمان ماتتكسفش ... اقلع دبلك ..

طارق : عايدة ..

عايدة : مش عاوزه أحطك فى موقف اختيار صعب .. بين الحكم والحب .. حط الدبلتين دول فى متحف مكاسب الثورة ..

(يزداد صوتها اختناقاً) .. باعتبارهم .. باعتبارهم رمز
... رمز لأول خساير الثورة ..

(تخرج في اندفاع قبل أن تنفجر باكياً)

طارق : (ينادى) .. عايدة ..

(على الفور يدخل الوكيل)

الوكيل : أنا حاططها يافندم تحت رقابة شديدة .. فيه احتمال
تكون فيه جهات أجنبية وراء فسح الخطوبة ..

(طارق يضطرب بعد أن أدرك أن كل حوار مع
خطيبته كان مسموعاً .. ينظر له بغل شديد ثم
يكمل بتؤدة وبطء وكأنه يحاول منع نفسه من
الانفجار)

طارق : من فضلك .. شيل الميكروفونات الى فى مكتبى ..

الوكيل : يافندم الشغل له أصول ..

طارق : من فضلك شيل الميكروفونات الى انت حاططها فى مكتبى ..

(وكيل المكتب يهز رأسه فى استسلام .. يخرج
من جيبه حقيبة بلاستيك صغيرة بها بعض مفاتيح
ومفكات صغيرة ، يبدأ فى خلع المايكروفونات ..
يتناول فائزة زجاجية .. الميكروفونات موضوعة
فى كل مكان فى الغرفة .. الحوائط .. الأرضية

.. مكتب طارق نفسه .. ملتصقة بكل الاثاث
.. يضعها في الفازة واحدا وراء الآخر فنستمع
لصوت ارتطامها بقاع الفازة الزجاجي .. ولتسهيل
المهمة على المخرج من الممكن ان تكون هذه
الميكروفونات ، دبابيس رسم او مسامير تنجيد
.. مغروسة في كل مكان .. الوكيل ينتهي من
لم الميكروفونات ثم يأخذ طريقه خارجا ..)

الوكيل : (وهو خارج) .. الباقي مش بتاعى ..

اظلام تدريجي

المشهد الثاني

(المسرح مظلم ، أسامة يدخل ومعه شمعة ،
يرتدى عباءة بيضاء لها غطاء رأس ، ليس مهما
أن يتبين الجمهور ملامح الممثلين في هذا المشهد
.. وإضاءة المشهد بشمعة واحدة كافيا تماما ..
ثلاثة أشخاص آخريين يظهرون .. يرتدون نفس
الملابس .. الحوار يدور همسا بين الجميع وفي
جو يفوح بالتآمر)

أسامة : قف من أنت ..

سعيد : ده أنا سعيد .. ومعايا خليل ومرسى ..

أسامة : كلمة سر الليل ؟

الثلاثة : الحق نفسك قبل ما تتاكل ..

أسامة : تعالوا ..

الثلاثة : خير ..

أسامة : لا مش خير .. عندي ليكم أنباء مؤلة ..

الثلاثة : يا ساتر ..

أسامة : الأفتدى ناوى يضيع البلد .. ويضيعنا ..

الثلاثة : يضيعنا مقيش مانع .. انما يضيع البلد .. لا ..

أسامة : ناوى ياكلنا كلنا .. أول حاجة اتخلص منها خطيئته ..

يعد كده حايخلص مننا واحد ورا واحد ..

الثلاثة : مش معقول .

أسامة : معقول ونص .. أنا وقع فى ايدي تقرير خطير .. كاتب فيه بخط ايده ... لابد من الانفراد بالحكم والتخلص من بعض زملائي .. لأنهم عيال ..

الثلاثة : والله ما حد عيل الا هو ..

أسامة : هو طبعا مش حايتهخلص من أحمد وإبراهيم وحسن لأنهم بتوعه .. ومسكهم أكبر حنت فى الوزارة .. ماسكين الداخلية والخارجية والخزانة والاعلام .. ماسكين ومتبتين جامده ..

سعد : أنا يا حسرة ماسك أهيف حاجة .. الثقافة .

خليل : آمال أنا أعمل ايه .. أنا ماسك الصحة .. يعنى العيانيين .. نفسى أمسك حاجة فيها الخير ..

مرسى : وأنا قال ايه ممسكنى السياحة .. مش عارف أمسك فيها حاجة خالص .. ولا سايج عاوز ييجى ..

أسامة : مفيش غير حل واحد .. عارفينه ؟

الثلاثة : نتغدى به قبل مايتعشى بينا ..

أسامة : ونعم الكلام ..

سعد : بس يا جماعة احنا حالفين على المصحف ماحدثش يأذى الثانى .

أسامة : الحلفان ماينطبقش علينا .. لأننا حناذيه أذية دفاعية ..
دفاعا عن البلد ..

خليل : وعلى أسوأ الظروف .. وعشان ما نطلعش كدا بين قدام ربنا
سبحانه وتعالى .. ليها حل .

الثلاثة : نصوم ثلاثة أيام ...

سعد : هس .. حد جاى ..

(يطفى الشمعة ، يظلم المسرح)

1. $\frac{1}{2} \pi$ is the angle between the two lines $\frac{x}{a} + \frac{y}{b} = 1$ and $\frac{x}{a} - \frac{y}{b} = 1$.

2. $\frac{1}{2} \pi$ is the angle between the two lines $\frac{x}{a} + \frac{y}{b} = 1$ and $\frac{x}{a} - \frac{y}{b} = -1$.

3. $\frac{1}{2} \pi$ is the angle between the two lines $\frac{x}{a} + \frac{y}{b} = 1$ and $\frac{x}{a} - \frac{y}{b} = 0$.

4. $\frac{1}{2} \pi$ is the angle between the two lines $\frac{x}{a} + \frac{y}{b} = 1$ and $\frac{x}{a} - \frac{y}{b} = 1$.

5. $\frac{1}{2} \pi$ is the angle between the two lines $\frac{x}{a} + \frac{y}{b} = 1$ and $\frac{x}{a} - \frac{y}{b} = -1$.

المشهد الثالث

(ظهور تدريجي للأضياء ، ابراهيم وأحمد يدخلان)

ابراهيم : السلطة دى لذة .. أنا كنت فاكّر ان أحسن حاجة فى الدنيا هى الكباب .. بعد ما وصلت للحكم غيرت رأيى .. تصور .. أبويا امبارح راح يدفع ايجار الشقة .. صاحب البيت حلف مائة طلاق ماهو واخد فلوس .. خطيب أختى كان متفق يدفع خمسمائة جنيه مهر وشبكة ... جه من نفسه دفع عشرة آلاف استرلينى ..

أحمد : مش كده وبس .. السلطة كمان تخل حظك كويس .. من خمسة أيام جالى واحد باع لى أرض المتر بربع دولار .. امبارح بالليل جه اشتراها ... تانى .. المتر بألف دولار .. عملت مبلغ ماكانش عند الملك قارون ..

ابراهيم : حاجة غريبة .. الراجل ده عنده أرض كثير قوى .. أنا كمان اشتريت منه ..

أحمد : وبعت له تانى ؟

ابراهيم : امبارح بالليل برضه .. راجل ظريف جدا .. مسافر سويسرا النهاردة الصبح .. ادبت له المبلغ يحطهولى هناك فى البوسته .. والظاهر كمان باع لبعض زملائنا .. الواد أسامة كان بيعنى امبارح .. ما باع لى وبعت له ..

(يدخل حسن أبو جراب ومعه مجلة أجنبية)

أحمد : (يعنفه فى غضب) .. ايه يا حسن .. كنت قين يا أخى ؟

حسن : باقولك ايه .. ماحدث يشخط في .. ماتشخطش في
تاني .. كفاية الى حصل ؟

أحمد : ايه الى حصل ؟

حسن : شخط في في التليفون أجهزة التصنت التقطت المكالمات ..
اتفضل شوف الجرايد الأجنبية كاتبة ايه النهاردة (يقرأ)
.. صراعات حادة وخلافات عميقة في مجلس الثورة .. كويس
كده ؟

أحمد : أنا آسف يا أبو علي ...

حسن : انتم قاعدين على مكاتبكم وانا دايخ في البلد باعمل نقابات
.. وابعت تلغرافات تأييد ..

ابراهيم : برافو ..

حسن : نقابة واحدة الى تعبتني قوى .. الحديد والصلب .. قعلت
أدور لحد مالقيت واحد حداد عجوز .. خليته يمضي على
التلغراف ..

ابراهيم : بس الدنيا كلها عارفة ان ماعندناش مصنع حديد
وصلب ..

حسن : مش المهم يكون عندك مصنع .. المهم الياطرة .. الياطرة
اتكتبت واتعلقت على دكان الراجل في ربع ساعة .. آمال
طارق فين ؟ ..

ابراهيم : جاي حالا .. أصل العلاقة متوترة شوية اليومين دول ..

حسن : علاقته بواشنطن ؟ ..

ابراهيم : بخطيبته ..

(المشرف يدخل ومعه صينية عليها أكواب الليمون
.. يرصها أمامهم على منضدة الاجتماعات ويأخذ
طريقه الخارج)

ابراهيم : (للمشرف) .. ابعث لى سجائر لو سمحت *

(المشرف يخرج ، يدخل الوكيل ، يضع أوراقا
أمام كل عضو .. أحمد يكلمه برقة وتواضع
تخفيان احساسا شديدا بالعظمة)

أحمد : هيه .. عامل ايه دلوقت ؟

الوكيل : كويس يافندم ..

أحمد : وازى الأولاد ؟

الوكيل : بيبوسوا اديك يافندم ..

حسن : لو احتجت أى حاجة .. تعالى لى مكتبى ..

الوكيل : ربنا يخليك لينا يافندم ..

(الوكيل يخرج)
(تدخل بقية المجموعة ، سعد وأسامة ومرسى
وخليل)

سعد : كله تمام .. أنا وأسامة حركنا المسيرة .. خليل ومرسى
نظموا الهاتفات ..

(طارق يدخل .. يقفون فى تكاسل)

طارق : اتفضلوا ..

(يجلسون)

أسامة : عارف يا طارق لو شفت المسيرة من الجو .. شيء جميل
فعلا .. آلاف السيارات الملاكي ..

خليل : ماشيين صفوف .. وبسرعة واحدة ..

مرسى : والناس سعيدة بشكل جنوني .. وقاعدتين يهتفوا
بالكلاكسات .. بيب بيب .. طارق ، بيب بيب طارق ..

طارق : هم دول بقي الى ممكن يهتفوا ضدى بنفس السعادة ..
ونفس الحماس .. حايبقى نفس الهداف .. بس حايزودوا
له كلمة يسقط ..

سعيد : طارق اسمح لى .. انت بدأت تتعالى على الجماهير .. دى
اهانة لعقلية الجماهير ..

طارق : الجماهير هى الى موتت سقراط يا سعيد .. ثم المسيرة دى
دش جماهير ده انت وأسامة لابسين جماهير .. متنكرين فى
هيئة جماهير ..

أسامة : ماهى طبعا الجماهير عاوزه حد يقودها ..

طارق : ياريت المسألة كانت تمت بالشكل ده ..

خليل : ماهى تمت بالشكل ده فعلا ..

طارق : لا .. بالفلوس ..

(يهيمك بكشفك فى يده)

طارق : ده كشف بالمبالغ الى انسحبت من وزارة الخزانة .. فيه مبلغ ضخيم جدا مكتوب قدامه تكاليف المسيرة ..

أسامة : فعلا .. بنزين وزيت .. وغدا وسجائر .. وبوكيت منى ..

طارق : (لا زال يطالع فى الكشف) .. مفهوم .. الحاجة الى أنا مش فاهمها .. عشرين ألف دولار .. أدوية للمسيرة ؟ ..

موسى : ابراهيم كروان هو الى قدم لنا الاقتراح ده ..

ابراهيم : فعلا ..

أسامة : دول يا سيدى اشترينا بيهم باستيليا للزور .. ودوا غرغرة .. وسكر نبات ..

خليل : فيه ناس كثير صوتهم بينشرح وهم بيهتفوا .. لازم نكون جاهزين لكل احتمال .. وكالات الأنباء نازلة تسجيل صوت وصورة ..

طارق : بشكل عام .. أنا مش موافق على السلوك الى من النوع ده ..

أسامة : (يهمس للجالس بجواره) .. بدأت الديكتاتورية .. عاوز يفرض رأيه علينا كلنا ..

طارق : الاجتماع ده حانخصصه لبحث ثلاث نقط .. شديدة الأهمية .. طريقة الحكم .. ؟ .. كيف سنحكم .. النقطة الثانية .. التسليح والجيش .. الثالثة .. الأمن .. لا بد من الانتهاء من بحث هذه المسائل النهارده .. لأنى حاسافر جنيف .. وحاجيب سنة ..

أحمد : مين الى حاجيكم وانت غايب ؟

طارق : مفيش حد .. لأنى مش حاكون غايب .. البوسطة حاتجيلي
كل يوم الصبح أمضيها .. وحايبقى جانبي فى الفصل تليفون
مباشر .. احنا عندنا دلوقت وزارة مدنية .. رئيس الوزراء
حاكون مسئول قدامى .

أحمد : هى الوزارة المدنية دى لسه حاتقعد ؟

طارق : أيوه ..

أحمد : يبقى نروح احنا بقى .. لازمنا ايه .. ؟

طارق : احنا مسئولين عن التخطيط .. وعن القيادة ..

سعد : الله .. ؟ .. مش المفروض نمسك كل حاجة ..

طارق : (بتوتر) أرجوك .. بلاش حكاية نمسك دى .. كلمة
ماسك .. ويمسك .. وتمسك .. بتعمل لى حساسية
شديدة .

خليل : (هامسا لزميله) .. واضح أنه عاوز يمسك كل حاجة
بنفسه ..

سعد : بلاش كلمة نمسك .. مش المفروض اننا حانحكم .. ؟

طارق : هو ده السؤال .. كيف سنحكم .. ايه النظرية اللى حانمشي
عليها .. الرأسمالية والا الاشتراكية .. ولا النظرية
الثالثة ..

حسن : الرأسمالية نظام فاشل ، والاشتراكية نظام فاشل ..
والنظرية الثالثة ما عرفهاش .. والديكتاتورية مكروهة ..
والديموقراطية ماتنفعناش .. يبقى مفيش قدامنا غير حاجة
واحدة ..

الجميع : ايه ؟

حسن : نحكم بالبركة .

الجميع : يعنى ايه ؟

حسن : يعنى زى ما تيجى معانا ..

ابراهيم : يا جماعة المسألة بسيطة جدا .. احنا هدفنا السعادة لكل

مواطن .. والانسان بيبقى سعيد لما يعمل اللي عاوز يعمل ..

نديها حرية .. نسيب كل واحد يعمل اللي على مزاجه .

أحمد : ماهو فيه ناس حايبقى لها مزاج تموتنا يا ابراهيم ..

نسيبها تموتنا .. ؟

أسامة : احنا ما سمعناش رأى طارق .

(طارق يقف .. يتحرك صامتا على المسرح فى

حيرة)

طارق : أنا حاكون صريح معاكم .. احنا مجموعة مليئة بالبراءة

والطهارة والنقاوة والحماس والنوايا الحسنة .. ومليانين كمان

حاجة تانية .. مليانين جهل ، وأنا أولكم .. قرينا صفحة

هنا وصفحة هنا .. كتاب هنا وكتاب هنا .. عارفين نظريات

الحكم بالشبه .. أنا كل أملى نعمل حكم ديموقراطى حقيقى

.. لكن ازاي ؟ .. ما عرفش .. الشئ اللي أنا متأكد منه ،

أنا بدأنا نرتكب نفس أخطاء الحكم العسكرى فى كل مكان

.. وحا يكون مصيرنا .. هو نفسه مصير الحكم العسكرى فى

كل مكان .. يا خوفى من اليوم ده .. لما نهزأ بعض ..

ونستهم بعض .. ونقطع فى بعض .. ونسجن فى بعض ..

وجايز نقتل فى بعض ..

أسامة : مش ممكن ده يحصص .. مستحيل .. ده احنا خالفين ..

طارق : جهلنا وأخطأنا ممكن تتجمع فى النهاية وتتحول لقنبلة
تنفجر فينا كلنا .. الحلفان مش حايمنعها .. ولذلك أنا
باقول نسيب كل حاجة على ماهى عليه لحد ما اتعلم أصول
الحكم .. وفى خلال السنة الى حاتعلم فيها .. ناعم قوتنا
الذاتية ..

سعيد : (هامسا لزميله) .. يقول الى عاوز يقوله .. وبعد
ما يسافر حانتصرف احنا ..

حسن : على العموم من حسن حظنا أن مجتمعنا مفيش فيه مشاكل
حادة .. يعنى لا عندنا اقطاع .. ولا استعمار ولا رأسمالية
مستغلة ..

ابراهيم : بالعكس الرأسمالية الى عندنا ظريفة جدا .. يعنى تبيع
أرض ، تشتترى أرض .. ولو لقينا بترول الشعب كله
حايتبسط ويبقى سعيد جدا ..

طارق : النقطة الثانية .. التسليح واقامة جيش قوى ..

(يضغط الجرس فيدخل المشرف ودعه شخص
شديد الأناقة يحمل حقيبة مسمونيات)

المشرف : السيد عدنان البندقجى .. مندوب شركات السلاح
العالمية ..

ابراهيم : (هامسا لأحمد) .. مش هو ده الراجل الى باع لنا
الأرض ؟

أحمد : (هامسا) .. آه هو ..

ابراهيم : يخرب عقله .. لحق يرجع من سويسرا ..

احمد : هس ..

(عدنان يتحدث باناقة رجال العلاقات العامة ،
ولكنه ينسى نفسه أحيانا ويصبح أشبه بهؤلاء
الذين يبيعون الشربة العجيبة في الموائد)

عدنان : السادة أعضاء مجلس قيادة الثورة .. مجموعة الشركات
الى باتشرف بتمثيلها .. لا تقدم فقط العتاد والسلاح ..
ولكنها أيضا تقدم .. المعرفة .. تقدم الدراسات والمعلومات
عن كل أعدائكم الحاليين والمحتملين .. وأيضا تقدم لكم
النصائح فى مواجهة كل الاحتمالات .. وآخر تقرير عندى ..
أن حضراتكم معرضين لغزو قريب .. من الجو .. والأرض
.. والبحر ... كمان بنتولى عمليات التدريب وتقديم الخبراء
.. وعمليات الصيانة وقطع الغيار .. وذلك بسعر التكلفة
الفعلية .. وبتمهيلات فى الدفع ... وبدون أرباح .. لأن
الشركات الى بامثلها .. تتمسك بالأخلاق والضمير وكل
هدفها هو مساعدة شعوب العالم الثالث الى يتبعث عن
الاستقلال .. وعن غد أفضل ..

(يفتح حقيبته .. نكتشف أنها ممتلئة بعدد كبير
من لعب الأطفال على هيئة أسلحة .. دبابات
وطائرات ... وغواصات .. الخ)

عدنان : (يخرج طائرة صغيرة) .. أعظم وأسرع وأقوى طائرة
مقاتلة فى العالم .. 4 H .. (يمر بها على الموجودين ليريهم

اياها عن قرب .. عندما يقترب من أحمد وإبراهيم يهمس
 لهما) .. حصل .. الفلوس انحطت في البوستة .. (يرفع
 صوته) .. أهم ميزة فيها أنها ماتنضربش على الأرض ..
 أى ضربة جوية مفاجئة تزوغ منها .. وتحط نفسها فى أقرب
 مخبأ .. عن غير طيار .. ولذلك العسكريين يسموها الزواغة
 خفيفة الدم .. ثمنها ٤٠٠ مليون دولار ربعمائة مليون دولار
 .. يا بلاش .. تدفعوا عشرة دولار عند توقيع العقد .. والباقي
 على أقساط ، ثمانية مليون دولار كل شهر .. طائرة واحدة
 بس فى الدنيا تعرف تتغلب عليها فى الجو وتضربها .. على
 الأرض هـ .. وده برضه احنا اللي بنعملها .. لسه بنعمل
 عليها تجارب .. بمجرد ماتخلص .. ناخذ القديم .. ونديك
 الجديد .. وتدفعوا الفرق .

(يخرج غواصة من الحقيبة)

عليان : الغواصة S 19 ... فتح فى عالم القتال البحرى ...
 غواصة مقاتلة .. لا يمكن كشفها بأى رادار فى العالم ..
 لان المواتير بتاعتها ساكنة .. معموله على نظرية العدة الساكنة
 بتاعة وإبور الجاز .. (يمر عليهم يريهم اياها يهمس لهم من
 بين أسنانه) .. احنا مفتحين قوى .. ونحب الراجل المفتح
 .. وبنتطلع جدعان معاه قوى .. ماحدش ضامن الزمن ..
 يحصل لك حاجة تلاقى لك قرشين حلوين ينفعوك فى
 سويسرا .. (يرفع صوته) .. ولا السمك نفسه يسمعها تحت
 الماية .. أهم ميزة فيها القدرة على المناورة السريعة .. والتنكر ..
 وإذا حوصرت من الأعداء ، عندها القدرة أنها تتحول لمركب
 شراعى عادى .. ثمنها ستمائة وخمسين مليون دولار .. خاتدفعوا

الربع والباقي على سنة وربع ٠٠ غواصة واحدة بس هي
الى ممكن تكشفها وتضربها ٠٠ س ٢٠ ٠٠ ودى برضه احنا
الى حانعلها ٠٠٠ لما تجهز ٠٠ تاخدوها ٠٠ وتدفعوا الفرق ٠

(يخرج دبابة)

عدنان : أحدث ما وصل اليه العقل البشرى فى صناعة المدرعات ٠٠
دال ١٥ ٠٠ D 15 ٠٠ دبابة مدرعة بأنواع سرية من الصلب
٠٠ لا يمكن اختراقها بأى نوع من أنواع المدفعية أو القنابل
٠٠ مجهزة بمدفعية صاروخية فى كل مكان ٠٠ (يمر عليهم
وهو يهمس بصوت لا يكاد يكون مسموعا) يا بخت من نفع
واستنفع ٠٠ (يرفع صوته) ٠٠ لو أصيبت إصابة عنيفة ،
حاتنقلب على جنبها ٠٠ وتمشى ، وتضرب ٠٠ ولو انقلبت
على ظهرها ٠٠ حاتمشى برضه وتضرب ٠٠ ولو حصل أنها
حوصرت واثأست لا قدر الله ٠٠ الأعداء مش حايعرفوا
يفتحوها وياخدوا الناس الى جواها ٠٠ لأنها بتتفتح من جوه
٠٠ دى بتتباع بالدستة ٠٠ الدستة بألف مليون دولار ٠٠
ممكن نخفض لكم ١٠٪ لو خدتوا عشر دست ٠٠

طارق : (بسخرية) ٠٠ وطبعاً الدبابة الوحيدة الى ممكن تضربها
هى دال ١٦ ٠٠ ودى لسه بتعملوها ولما تخلص ، حاتدوها
وندفع الفرق ٠

عدنان : ما بنعملش دبابة اسمها دال ١٦ ٠٠ احنا بنعمل دال ١٥
المعدل ٠٠ الى هى المحسن ٠٠ هى دال ١٥ ٠٠ الفرق
فى الاكصدام والفوانيس وفى لون المدافع ٠٠ ومتركب لها
مراية زيادة ٠٠ لكن أنا أنصحكم تاخدوا دى ٠

طارق : شوف يا عزيزى البندجى .. انت الظاهر عليك غلطت فى
العنوان .. احنا ماعندناش فلوس للحاجات دى كلها .. ولما
يحصل الغزو .. أنا حاعرف أخى الناس تصدده بالبنداق ..

عدنان : عندكم فلوس يافندم .. حاتلاقوا بترول .. التقرير الى
عندى انكم حاتلاقوا بترول النهارده الساعة اتناشر ..

طارق : انت دمك خفيف قوى .. اتناشر ونص ومالقيناش حاجة ..
(فى نفس اللحظة يدخل المشرف ومعه ورقة صغيرة يضعها
أمام طارق وينصرف)

طارق : سحر .. كل الشركات لقت بترول ..

عدنان : مش قلت لك يافندم ..

(تتناثر تعليقاتهم)

... : الحمد لله ..

... : ياما انت كريم يارب

... : ده ربنا عالم بحالنا ..

... : أيوه كده يا أخى .. خلينا نعمل حاجة .. نعمل حاجة
للبلد ..

... : أيوه .. نعمل حاجة للزمن ..

... : الخير على قدوم الواردين .. الراجل ده وشه كويس
علينا ..

... : لازم نشترى منه حاجة ..

... : مدام ربنا اداانا .. نكسر بخاطره ليه ... ؟

طارق : بتترول غريب .. بيلاقوه فى الوقت والمكان الى هم عاوزينه بالضبط .. عشرين ألف برمىل فى الساعة ..

عدنان : (مصمحا وهو يقرأ من ورقة فى يده) .. عشرين ألف ٢٢٥ يافندم ..

طارق : بالضبط .. دى كومبيينة بقى .. لقوا البترول وعاوزين ياخدوه ويدونى شوية حديد .. فلوس البترول حاصرفها فى حاجات تانية ...

أحمد : (محتلم) .. وده اسمه كلام يا طارق .. انت حاتسيبنا عريانيين فى المنطقة .. ؟ .. يعنى ايه .. ؟ .. مش حانعمل جيش قوى ؟

(طارق يصمت وينظر له فى عتاب ثم يتوجه بجديته لعدنان)

طارق : طيب يا سيد عدنان .. احنا خدنا فكرة .. وحانبقى نبعث لك ..

عدنان : تحت أمركم ..

(يخرج)

طارق : أحمد ماتنساش نفسك .. ماتكلمنيش بالشكل ده قدام حد غريب .. ماتغلطش فى ..

أحمد : غلطنا فى البخارى يا خى ..

طارق : خليك مهذب واحترم نفسك ..

(أحمد يواجهه فى غضب)

أحمد : الله .. ماتاخذنى قلمين بالمرة ..

(حسن يتدخل يبعدهما عن بعضهما)

حسن : يا جماعة مش كله .. روقوا ..

طارق : (محتدا) .. مش أول تاجر سلاح يجيلى أشتري منه ..
ومش أى نوع سلاح أشتريه .. انتم ناسيين ان احنا لسه
ماعملاش جيش .. أجيب الحاجات دى عشان تصدى عندى
.. لازم أسأل ناس عندها خبرة ..

حسن : أنا من رأيي تسأل الناس الى بتثق فيها .. انت مش
بتثق فينا ؟

طارق : طبعاً ..

حسن : خلاص .. اسألنا ..

أسامة : (بلهجة غير ودية) .. على العموم حضرتك مش بتاخذ
القرار لوحدهك .. احنا حنناقش المسألة .. والقرار حايكون
بالأغلبية ..

طارق : جرى ايه يا أسامة .. ؟ .. انت عاوز توحى للأخوة الزملاء
أنى بدأت أتحول لديكتاتور والا ايه ؟ ..

أسامة : والله أنا مش باوحى بحاجة .. أنا باتكلم على الى مفروض
يحصل ..

(أسامة ينهض وهو يقول جهلته الى الشرفة ويضع
كفه فوق عينيهِ يراقب شيئاً بعيداً)

ابراهيم : والله يا اخوان أنا من رأيي نشترى .. دى فلوس طالعة
من تحت الأرض .. حد عارف ده رزق مين ؟ .. مش جايز
شركات السلاح دى بتصرف على ناس غلابة فى أوروبا ..

(أسامة يعود من عند الشرفة)

أسامة : المسيرة على وشك الوصول .. حانشوف خير الأمن
والا نأجله لبعد المسيرة ؟

طارق : نشوفه .. ونبحث الموضوعين مع بعض ..

(يضغط زرا فيدخل المشرف ومعه السيد تنتهى
الأمان .. هو نفسه عدنان البندقجي بعد أن
أضاف شارباً وغير الجاكنته .. يضع على عينيهِ
نظارة سوداء كبيرة .. ويرتدى قبعة وخوة تنزل
حافتها على عينيهِ)

المشرف : السيد منتهى الأمان .. خير الأمن المعروف .. وأخصائي
حماية الحكومات العسكرية .. دبلوم على فى الوشاية
والنميمة .. ماجستير فى مكافحة أجهزة التصنت والتصوير
.. دكتوراه فى القمع .. درجة الزمالة .. زميل كلية
المخبرين الملكية فى لندن ..

(المشرف يخرج .. منتهى يخلع النظارة والقبعة
.. يرهف السمع .. يجيل نظره فى اتجاه المسرح)

وكانه يراقب خطرا ما .. يرفع أصبعه الى شفتيه
طالباً منهم السكوت .. يفتح حقيبتة ويخرج
منها لعبة صغيرة على هيئة كلب .. يقترب بها من
جدران المسرح وقطع الديكور .. الكلب يصدر
صوتا ... يقترب من قطعة معينة من الديكور ثم
يخرج مفكاً صغيراً يلتقط به قطعتين معدنيتين)

مستهى : دلوقت نقدر نتكلم ..

طارق : ميكروفونات .. ؟

مستهى : (ببساطة ولا مبالاة) .. لا .. دى كاميرات موديل ٧٤ ..
دى كاميرا واحد مللى .. ودى نص مللى .. صوت وصورة ..
مجهزة بمعمل طبع وتحميض .. تصور وتحمض وتطبع فى
نفس اللحظة برضه الفيلم بيتبعت باللاسلكى لقمر صناعى ..
القمر يعكسه تانى .. فيلم ٣٥ مللى .. الكاميرا دى حاططها
السوقييت .. لذلك نلاحظ أنها كبيرة نسبياً .. والفيلم
أبيض واسود .. (مشيراً للكاميرا الأخرى) .. ودى أمريكية
بتشتغل بفيلم ألوان اسكوب ..

(يفسح الكاميرات والكلب الصغير فى التحقيق ثم
يوأجههم)

.. سادتى .. هذه التجربة البسيطة تثبت لكم أن الشركات
التي أمثلها تمتلك أحدث أجهزة التصوير والتصنت ..
وأجهزة الكشف عنها ثم أجهزة الكشف على الأجهزة التي
تكشف عنها .. ثم أجهزة كشف أجهزة التشويش على
الأجهزة التي تقوم بالشوشرة على الأجهزة التي تقوم

بالتشويش على الأجهزة .. وهكذا .. الى ما لا نهاية .. أما
آخر اختراع عندنا فى مجال الأمن السياسى .. فهو ده
(يخرج شيئاً من الحقيقة) معتقل كاوتش .. مبنى على
نظرية قارب النجاة المصنوع من المطاط .. المعتقل ده ...
يتنفخ .. ياخد عشرين ألف معتقل .. وهو ده متوسط عدد
المعتقلين فى بلاد العالم الثالث .. وعندنا كمان ..

(يعود للحقيقة ويخرج منها جهازاً دقيقاً أشبه
بالساعة)

منتهى : ايه ده يا جماعة .. دى الأودة ملغمة ..

(يقترب من الموجودين .. يمر عليهم بالجهاز ..
يتوقف عند حسن .. يمر بالجهاز على بدلته)

منتهى : لا مؤاخذه يا فندم .. آخر مرة قلعت الجاكته دى امتى ؟
حسن : امبارح .. البدلة كلها راحت للمكوجى ..

(منتهى يجذب زراداً فيخلعه من الجاكته)

منتهى : وعند المكوجى .. انشال الزرار الحقيقى واتركب ميكروفون
اليكترونى من النوع المتخلف موديل ٦٦ ... بيرسل لجهاز
استقبال فى الغالب محطوط فى عربية على بعد ثلاثة كيلو ..
فيه قاعدة مهمة جداً فى الأمن .. احترس من المكوجى ..

(يعود للنظر فى الجهاز)

منتهى : فيه جهاز ريكورد من أحدث الأنواع موجود هنا ..

طارق : ريكورد .. ؟

منتهى : آية .. ومن أخطر الأنواع .. من النوع الى احنا بنعمله

.. ريكورد كاست ربع مللى .. فى حجم حبة السمسم ..

بس حالاقيه .. حا يروح منى فىن ؟

(بسرعة يخرج جهازا آخر .. يهر به على الموجودين

ثم يتوقف عند الساعة .. يقترب بالجهاز من

خلده)

منتهى : حضرتك بتشتكى من درسك .. ؟

أسامة : ما بشتكيش منه دلوقت .. حشيتة امبارح ..

منتهى : والدكتور الى حشيت عنده درسك .. عيادته هنا ؟

فى البلد ؟

أسامة : لا .. ده أخصائى أجنبى .. كان جاى زائر فى المستشفى

العام .

منتهى : وبعد ما حشى لك درسك سافر .. ؟

أسامة : أيوه ..

منتهى : طب لو سمحت افتح بقبك .. ماتخافش ..

(يهد يده بهلقاط صغير داخل قم أسامة ..

يخرج شيئا لا يرى بالطبع .. يستعين على رؤيته

بعدسة)

منتهى : ريكورد بيشغل بالبطارية .. مجهز بوحدة ارسال ..

ممكن يرسل لمدة سنتين .. طول ما انت فاتح بقبك بيسجل

ولما بتنقل بقبك بيسجل من مناخرك ..

(أسامة يشعر بالاهانة فيقف ثائرا في سخط)

أسامة : أما راجل قليل الأدب صحيح .. انت جاي تنصب علينا
جاي تضيع وقتنا يا راجل انت .. اتفضل بره .

متهنى : أنا ممكن أقبل أى اهانة فى الدنيا .. لكن لا أقبل أن
أطعن فى شرف مهنى .. حالا حاسمك عينة ..

(يخرج جهازا آخر يضع فيه الريكوردر المزعم
بواسطة الملقاط فستمع من خلال سماعة
المسرح الصغيرة الى الحوار الذى تم فى المشهد
الثانى بين أسامة وزملائه .. قب من أنت ..
ده أنا سعد ومعايا خليل ومرسى .. الخ ..
نستمع فى سماع الحوار ... الموجودون
صامتون)

أحمد : (يصيح بانفعال) .. مؤامرة ..

(اللحظات القادمة سريعة مبهمة .. تتعالى فيها
الصيحات والصرخات موحية بجو العنف .. طارق
يحفظ بهدوئه محاولا السيطرة على الموقف ..
كل هذا يحدث وحوار المشهد الثانى المسجل
مستمع .. عند نهاية حوار المشهد ، يأخذ متهنى
الجهاز ويخرج سريعا)

أسامة : (يخرج مسدسه) .. ارفع إيدك لفوق انت وهو ..
ولا كلمة .. أى حركة حانضرب فى الملبان ..

(خليل وسعد ومرسى يفتحون حقائبهم ويخرجون
الرشاشات يناولون أسامة واحدا)

مرسى : أقف جانب الحيطه انت وهو ..

(أحمد وحسن و ابراهيم يقفون بجوار الحائط ..
خليل وسعد يجرون لهم عملية تفتيش سريعة)

أحمد : (يحاول الاحتجاج) .. أسامة .. اعقل يا أسامة .

أسامة : اخرس .. ماحدث يفتح بقه بكلمة .. أقف ثابت .. حالا
حانشكل لكم محكمة عسكرية .. أى حركة حانضرب فى
المليان ..

طارق : (بهدوء شديد) .. بحيث لما تيجى المسيرة .. تخرج لهم
انت .. تديهم الاشارة .. يهتفوا بسقوطى .. وبالليل
يشوفونى فى التلفزيون وأنا باعترف .. باعترف انى
ديكتاتور .. وجايز أعترف انى خاين ..

أسامة : بالضبط .. ده الى حاتعمله .. اتفضل اكتب استقالتك ..

طارق : حاضر ..

حسن : جبان ..

أسامة : اخرس ..

طارق : ليه يا حسن .. ؟ أسامة برضه أخونا وحبيبنا .. مش
جايز يحكم أحسن منى ..

أسامة : اكتب الاستقالة .. (ينادى) .. هيئة المحكمة ..

(المدير والوكيل والمشرف يدخلون)

أسامة : ماحدث يدخل المبنى .. وماحدث يخرج منه .. اقطعوا
كل الاتصالات بالعالم الخارجى ..

المدير : حاضر يا فندم ..
 طارق : الله .. دى هيئة المكتب معاهم ..
 المدير : احنا مع السلطة الشرعية ..
 طارق : أنا السلطة الشرعية ..
 المدير : (يشير لأسامة ومجموعته) .. السلطة الشرعية الى هى
 معاها الرشاشات ..

(تخرج هيئة المكتب)

أسامة : انت متصور انى حاسيب مصير شعبنا فى ايد واحد رومانسى
 مجنون زيك .. ؟
 طارق : غلط طبعا .. لازم الى يحكم يكون واحد عاقل زيك ..
 أسامة : اكتب الاستقالة ...
 طارق : حاضر .. ماتزعقش .. حارفعها لمين ؟ .. للشعب طبعا ..

(يمسك ورقة ويبدأ فى الكتابة)

طارق : عزيزى الشعب الذى يتحدث الجميع باسمه وبالنيابة عنه
 الصالحون والمفسدون .. الحالمون والواقعيون .. الأذكياء
 والبلهاء .. أرفع اليك استقالتي هذه .. بمحض اختياري ..
 وبكامل ازادتي .. (يتوقف وينظر لسعد) .. يا سلام ..
 يا سعد .. نفس المصير الى ترسم لك من قبل ما تتولد ..
 انك تتحول لجناد .. يا خسارة .. ايه الى يخلى الشاعر
 يتحول لجناد .. أنا حاستقيل يا سعد .. وماعرفش
 حاتسجنونى والا حاتنفونى .. والا حاتقتلونى .. لكى الشىء
 المؤكد .. ان الثورة حاتبتدى تاخذ اللون الأحمر ..

اسامة : (يصرخ فيه) .. ماتتكلمش مع حد .. اكتب الاستقالة ..
طارق : (يركز نظراته فى عينى سعد) .. كنت متصور
ان اليوم ده حايجى يا سعد .. ؟ انك ترفع الرشاش على
اخواتك ..

اسامة : ماحدش يسمع كلامه .. لسانه مليان سم ..
طارق : لا أمل .. لازم اكتب الاستقالة ..

(يعود للورقة)

سعد : ماتكتبش الاستقالة يا طارق (يترك مكانه) .. أنا مع
طارق .. الى حايقرب منه حافرغ فيه الرشاش ده ..
طارق : الى يقعد معايا يا سعد مايرفعش رشاش .. يرفع كلمة
يرفع فأس .. ماترفعش الرشاش على اخواتك ..

(ياخذ منه الرشاش ويضعه على المكتب)

طارق : أنا حامشى قبل ماتنزل نقطة دم من أى حد فينا .. احنا
ناس ناضجين .. وبنحب بعض .. مش كده يا خليل ..
مش كده يا مرسى .. يا خسارة .. كان نفسى نخرج كلنا
للجماهير واحنا يد واحدة .. رمز للاتحاد والاخوة وانعدام
الأنانية .. أصغر وأظهر مجموعة حكمت دولة ..

(بهدوء شديد خليل ومرسى يتركان مكانهما
ويضعان الرشاشين على المائدة ويقفان بجوار
طارق)

أسامة : خونة .. حافرغ فيكم الرشاش كلكم ..
(أسامة يرتجف من الانفصال .. من الواضح أنه
ووقع تحت تأثير إجهاد عصبي يضعه على حافة
الجنون)

طارق : وتخرج للجماهير تقول لهم ايه ؟ .. قتلت كل مجلس قيادة
الثورة ..

(يقترب من أسامة حتى يلتصق به .. فوهة
الرشاش تلامس قلب طارق)

طارق : ضغطة منك دلوقت تطلع عشرين طلقة فى قلبى .. بس
ماتنساش حاجة ... الى بتاخده بالقوة .. فيه واحد
حاييجي يحرمك منه بالقوة .. (هامسا فى رقة) نزل
الرشاش يا أسامة .. ممكن أحقق لك كل الى انت عاوزه
.. من غير الرشاش ..

(يده تتراخى ، يسقط الرشاش على الأرض ..
يرتمى على صدر طارق وهو يبكي بحرقة)

أحمد : (صائحة) .. محكمة ..

(الجزء الباقي وحتى نهاية الفصل الثانى لا يجب
أن يستغرق تنفيذه بحال من الأحوال أكثر من
دقيقة .. ثلاثة يشكلون هيئة محكمة ، اثنان
ينقضان على أسامة فينتزعانه من صدر طارق
ويقفان عليه حرسا بالرشاشات .. أحمد يلعب
دور القاضي .. حسن عضو اليمين .. إبراهيم

عضو اليسار .. سعد يقوم بدور المحامي
(والادعاء)

القاضي : المتهم أسامة الزهار .. مذنب ؟

أسامة : ماتفرقش ..

القاضي : الادعاء ..

ممثل الادعاء : وبناء على كل ما تقدم .. أطالب باعدام المتهم ..

القاضي : الدفاع ..

(ممثل الادعاء ينتقل للمناحية الأخرى ليقوم بدور

ممثل الدفاع)

الدفاع : طبعاً أنا موافق على اعدامه .. لكن .. عشان الشكليات

.. أطالب الرأفة لموكلتي ..

(تتقارب رؤوس هيئة المحكمة في عمليات تشاور

سريعة)

عضو اليمين : محكمة ..

القاضي : حكمت المحكمة حضورياً على المتهم أسامة الزهار بالاعدام

رمياً بالرصاص .. (بعنف بالغ) .. دور ..

(بحركة عسكرية سريعة وخشنة الحارسان

يقتادان أسامة ويقفان به في مواجهة طارق)

القاضي : ويرفع الحكم للتصديق ..

(أحدهم يأخذ الحكم بسرعة ويقدمه لطارق الذي
يؤشر عليه)

طارق : يخفف حكم الاعداد ... ويكتفى بلفت نظره ... وينقل سفيرا
لنا فى بلاد الاسكيمو ... مقيش حد حايوت ... ولا حد
حايئاذى ... لسبب بسيط (بأسى شديد) ... ان المسرحية
كوميدي ... والناس لازم تضحك أكبر كمية ممكنة (بمرارة)
... ده الناس حاتضحك علينا ضحك ...

(بنشاط يتجه الى الشرفة ، يفتحها فنستمع
لصوت صياح الجماهير (طارق ... طارق) يشير
لزملائه أن يتقدموه الى الشرفة ... يرفع ذراعيه
... يزداد هدير الناس ... بينما تنزل ...)

الستار

الفصل الثالث

شماره ۱۲۵

المشهد الأول

(يفتح الستار عن فصل دراسي شديد الأناقة ،
جهاز تليفون فوق كل تفتة .. لوحة لجسم
بشرى بالحجم الطبيعي ، جسم بشرى متكامل
العضلات وكأنه بطل أغريقي قديم .. جورج
الفراش يقوم بتنظيف الفصل وتلميع المقاعد ..
جورج هو نفسه خبير الأمن والسلاح الذي رأيناه
في الفصل الثاني ، يرتدى يونيفورم بسيط
يجعله أشبه بعمال الفنادق يتأكد من عدم وجود
أحد يراه فيقوم - بخفة وسرعة - بتكوين أشياء
في أجهزة التليفون .. وفي الأدراج .. طارق
يدخل .. يتأمل المكان الذي يراه لأول مرة)

جورج : أهلا بيك يافندم .. أهلا بيك في أكاديمية حكم الشعوب
.. سويسرا نورت ..

طارق : منورة بأهلها ..

جورج : محسوبيك ريدي جورج .. الفراش ..

طارق : ريدي جورج يعنى جورج الجاهز ..

جورج : بالضبط يافندم ..

طارق : أهلا يا جورج ..

جورج : أهلا بيك يافندم .. النهارده صور حضرتك منورة كل
الجرايد والمجلات .. حضرتك حليت مشكلة كبيرة جدا ..

الأكاديمية مفتوحة بقى لها شهر .. بمجرد ما حضرتك قدمت،
كلهم قدموا .. ولذلك ، أوروبا والعالم كله بينظروا لك فطرة
خاصة اذاعة لندن قانت ان حضرتك حاتدى للحكم
المسكرى وجهه المشرق .

طارق : متشكر ..

جورج : ربنا يقويك يافندم .. (بلهجة خاصة) .. أى حاجة من
سويسرا ... أى خدمات .. أنا تحت أمرك ..

طارق : (ببرود متجاهلا ما يقصده) .. خدمات زى ايه ؟

جورج : زى أى حاجة .

طارق : زى ايه .

جورج : أى حاجة موجودة فى سويسرا .. ساعات مثلا ..

طارق : متشكر .. (يتفرس فى وجهه) .. متهيأ لى شفتك قبل
كده ..

جورج : ما اعتقدش يافندم .. هو أنا بس وشى من النوع المألوف .

طارق : أنا متأكد انى شفتك قبل كده .. استنى .. انت بتاع
السلاح ..

جورج : عدنان البندقجى ؟

طارق : أيوه ..

جورج : ده ابن عمى .. نسخة منى .

طارق : يبقى ..

جورج : منتهى الأمان .. خبير الأمن .

طارق : فعلا ...

جورج : ابن عم أبويا .. أصلنا مجموعة من أولاد العم كلنا صورة طبق الأصل من بعض (بسرعة كما لو كان يريد أن يتهرب) .. أهلا بيك يافندم .. عن اذنك ..

طارق : (يستوقفه) .. جورج .. استنى ..

(ينظر له طويلا)

طارق : انت شغال مع مين .. (لحظات) .. الروس والا الأمريكان؟
جورج : انت ذكى جدا يافندم .. وأنا أموت فى الأذكىاء ..
خصوصا الأذكىاء بنوع العالم الثالث .. أى خدمات من سويسرا .. أنا تحت أمرك ، لو وقفت فى أى شارع وقلت أنا عاوز جورج .. ألف مين حابذك .. (يستدير لينصرف) .. عن اذنك ..

طارق : ما جاوبتش على سؤالى ..

جورج : مفيش حاجة اسمها الروس وحاجة اسمها الأمريكان ..
وده الخطأ الى بتقعوا فيه .. فيه حاجة اسمها القوى الأعظم ..
الملوك .. ولما الملوك تلعب مع بعض .. أو تهزر مع بعض ..
ماحدث منكم له دعوى .. لذلك المثل السويسرى بيقول ..
حاتروح فين يا زعلوك بين الملوك .. هاها .. عن اذنك ..
يافندم ..

طارق : برضه ما جاوبتش على سؤالى .. شغال مع مين ؟

جورج : بصراحة ؟

طارق : أيوه ..

جورج : ما عرفش .. أنا باصحي من النوم ألاقى ظرف تحت المخدة ..
.. فيه فلوس وتعليمات .. أنفذها .. حتى لو رحت أنا
عند واحد صاحبي .. الصبح ألاقى الظرف تحت المخدة ..
لو رحت نمت في لو كائنة .. الصبح ألاقى الظرف تحت دماغى ..
.. حبيت أعمل تجربة .. سببت الشقق واللو كائنات ..
ورحت نمت في خرابة وحطيت تحت دماغى قالب طوب ..

طارق : والصبح لقيت الظرف تحت قالب الطوب ..

جورج : لا .. لقيت مخدة تحت قالب الطوب .. وتحتها الظرف ..

طارق : يحصل ايه لو خدت الفلوس وما نفذتش التعليمات .. ؟

جورج : أموت .. وفي أى مكان فى العالم .. حادثة عربية فى
باريس .. هبوط مفاجئ فى القلب فى روما .. أقع من
بلكونة فى لندن .. علما أن لندن ما فيهاش بلكونات .. هاهما
.. أى خدمات من سويسرا ..

طارق : متشكر ..

(يخرج جورج عندما تدخل مجموعة من الحكام
العسكريين ، مهمة مصمم الأزياء أن يوحى فى
تصميمه ملابسهم وبشكل غير مباشر بالبلاد التى
ينتمون اليها كما أن مهمة المخرج أن يختار عناصر
توحى لملامحها بالانتماء لأجناس مختلفة .. تكشيرة
غبية تعلو وجوههم .. يتجاهلون طارق تماما ..
طارق ينظر لهم مبتسما فى ترحيب)

طارق : أهلا .. أهلا .. أرجو اننا نقضى عام دراسى موفق ..
انشاء الله .. واهى فرصة طيبة .. عشان نقدم لشعبونا ..
(ينظرون لهم بتجهم وبلا ترحيب .. تموت
بتسامته)

طارق : (هامسا لنفسه) .. أعوذ بالله .. ده ايه التكشيرة دى ؟
ربنا يكون فى عون الشعوب اللى بتحكموها ..

(يدخل كاباكا وهو عملاق افريقى يرتدى ملابس
عسكرية مزركشة ، يقف مقدما نفسه بصوت قوى
وشراسة)

كاباكا : رئيس جمهورية كباچنيا الديموقراطية .. كباكا ..
كابانجو .. شنجر شنجر سنجر ، نوه .. بارنجى ..
مارنجى ..

طارق : يعنى .. ترجم .. يعنى ايه ؟

كاباكا : يعنى .. التمساح العظيم ، الملتهم ، الشرس .. الذى
يلتهم أعداءه واحدا بعد الآخر فى سهولة ويسر .. بلا رحمة
ولا شفقة .. المعادى للديكتاتورية .. وحافى حوى
الديموقراطية فى الغابات الشاسعة ..

طارق : أهلا وسهلا .. (لنفسه) .. ونعم الزملاء .. دى حاتبقى
سنة دراسية منيلة بستين نيلة ..

(كاباكا يجلس .. يرفع سماعة التليفون فى
وقار .. كل المجوعة ماعداء طارق تقوم بنفس
الحركة)

كاباكا : خد الأخبار دى عندك ..

المجموعة : خد الأخبار دى عندك ..

(المجموعة تردد مقاطع من كلمات كاباكا)

كاباكا : نزلها فى التلفزيون والاذاعة .. والجرايد .. وأجهزة
توجيه الرأى العام .. علقوها على قمم الأشجار فى الغابات
.. ارسموها على الرمل فى الصحرا .. افتحوا عقول الناس
وحطوها جواها ..

المجموعة : وحطوها جواها ..

كاباكا : هيئة التدريس فى الجامعات السويسرية تبدى دهشتها
واعجابها من المستوى الثقافى الرفيع لكاباكا .. كاباكا يحصل
على الدرجات النهائية فى كل مادة .. كاباكا يكتسح كل
الرؤساء العسكريين فى مادة الديموقراطية .. ترشيح كاباكا
للعمل أستاذًا بالأكاديمية .. (لحظة) .. الأوغاد أعداء الشعب
أخبارهم ايه ؟ .. اعلمهم .. يتحاكموا النهاردة ويتعلموا
بكرة .. بس المحاكمة تكون عادلة .. اوغوا تشنقوهم من
غير محاكمة .. ماتودوناش فى داهية .. (لحظة) ..
صنعوها محلى .. مفيش مشانق فى سويسرا .. دخت امبارح
فى السوبر ماركت مالقيتش .. الحبال الى هنا كلها بلاستيك
.. ماتنفعش ..

طارق : (يجد ووقار شديد وكأنه يتحدث عن مشكلة تخصه أيضا)
.. فعلا .. الحبال البلاستيك ماتنفعش .. ممكن نتهم بأننا
بنستخدم حبال مستوردة .. الحبال الى نشنق بيها لازم
تكون نابعة من تقاليدنا وتراثنا ..

كاباكا : هيه .. اليمين المتطرف عمل ايه ؟ .. واليسار المتطرف
عمل ايه ؟ .. واليسار المتطرف .. ؟ .. والوسط المتطرف .. ؟ ..
كله تمام .. ؟ .. كويس .. مع السلامة ..

(يضع السماعة .. المجموعة كلها تنهى المكالمه
فى نفس الوقت)

طارق : (لنفسه) .. طبعا الوسط المتطرف ده هو أخطرهم ..
(يلتفت لكاباكا) .. ايه يا عم كاباكا .. كل صحافة العالم
بتقول ان الدراسة لسه حاتبتدى النهارده .. ايه بقى يكتسح
وحكاية المستوى الثقافى الرفيع .. الناس تقول عليك ايه
لما تقرا الجرايد ..

كاباكا : معانديش حد بيقرا صحف أجنبية ولا محلية .. نسبة
الأمية فى شعبى ٩٨٪ ومعمول حسابها انها تبقى ١٠٠٪ فى
الخطة الخمسية الى جاية ..

طارق : ربنا يقويك .. ومش خايف من الاثنين فى المائة الى
بيقروا ؟

كاباكا : لا .. لأنهم بيشغلوا معايا ...

طارق : والاذاعات .. ؟ شعبك أطرش كمان .. ؟

كاباكا : عامل شوشرة على كل المحطات .. اطمن .. أنا عامل
حساب كل حاجة .. محسوبك التماساح الشرس ماسك البلد
بايد من حديد .. ضامن الحكم لأولادى وأولاد ولادى خمس
آلاف سنة لقدام ..

(كل أجراس التليفونات تدق في وقت واحد ..
يرفعون سماعات التليفون ماعدا كاباكا الذي
لا يبدق تليفونه ، يستمعون لحظة ثم يضعون
السماعات)

الجميع : كاباكا .. كل سنة وانت طيب ..
كاباكا : وانتم بالصحة والسلامة .. خير .. ؟ عيد ميلادي
النهاردة ..

طارق : لأ .. انقلاب يا خسارة ، صيفت بدرى يا تمساح يا شرس
اتضح انك مش ماسكها بايد من حديد ولا حاجة ..

(يدخل بونجو الحاكم الجديد)

كاباكا : (ترتفع روحه المعنوية قليلا عندما يشاهده) .. ده بونجو
.. سكرتيرى ومدير مكتبى وأخويا وحبيبى .. تعالى
يا بونجو .. طمنى .. مين اللى عمل الانقلاب .. ؟
بونجو : (بشراسة) .. أنا ..

(يغمى على كاباكا .. يسقط على التختة بلا حراك)

بونجو : (مقلما نفسه) .. بونجو باندا باندا .. سارجى ..
مارجى ، سيكالولو شنجى ، سنجى ، نو .. يارنجى ..
مارنجى ..

طارق : يعنى .. ؟

بونجو : يعنى التمساح الطيب الذى تمكن من التهام التمساح
الشرير ..

طارق : (يكمل له) .. الذى يلتهم أعداءه واحدا بعد الآخر فى
سهولة ويسر .. بلا رحمة ولا شفقة ، المعادى للديكتاتورية ..
وحامى حمى الديمقراطية فى الغابات الشاسعة ..

بونجو : بالضبط ..

طارق : يا أهلا بيك ..

(يدخل جورج فى خفة وهذوء ومعه زجاجة
صغيرة وحقيبة سفر متوسطة الحجم ، يقترب
بالزجاجة من أنف كاباكا فيفيق)

جورج : (يكلمه همسا مواسيا) .. أخ كاباكا .. الجماعة كلفونى
أبلغك أسفهم الشديد لى حصل .. الشنطة دى فيها بيجاما
وشبشب وقميص وبنطلون وأدوات حلاقة .. وفيه كمان فى
الشنطة عقد شراء بيت صغير باسمك ... البيت فى قرية
اسمها منسر فيل .. وهى أقرب مكان للبنك الى انت حاطط
فيه المبالغ اياها .. فيه احتمال الصدمة تنسيك الرقم السرى
الى انت حاطط فيه الفلوس .. (يخرج من جيبه كارت
صغير) .. أهوه ..

(يعطيه الكارت والحقيبة ويخرج بهذوء وهو
يغمز لطارق بعينه قبل أن يخرج ينحنى هامسا
لأحد الطلبة)

جورج : مليون دولار وربع أجيب لك كل امتحانات آخر السنة
قابلنى فى الحوش ..

(يخرج)

(كَابَاكَا الذى كان على وشك الخروج يقف خطيبا
فيهم بكبرياء وهو متمالك لنفسه تماما)

كَابَاكَا : لن يسكن شعبي وان بدا ساكتا .. لن ينحنى شعبي وان
بدا منحنيا .. لن يخضع شعبي وان بدا خاضعا .. وأنا ..
أنا لن أنخ وان بدوت ناخعا .. وستردد الغابات أصدااء أحلام
الشعب التى كنت أنوى تحقيقها .. وسترى وسترون ..
حاشوفوا .. (بسرعة خاطفة يخلع غطاء الرأس ويفتح
صدره وينهار مولولا) .. حاشوف فيك يوم يا بونجو يا بن
باندا .. ربنا على الظالم .. ربنا على المفتري .. ربنا على
الخاين .. يا خاين العيش والملح .. تخونك الأيام ؟ ..
تخونك الليالى الى سهرناها سوا نموت فى أعداء الديموقراطية
.. روح يا بونجو .. الى ييجى على مايكسبش .. مدام جيت
على عمرك ما حاتكسب ..

(ينهار باكيا بحرقة)

طارق : الله .. الله .. مش كدا يا كَابَاكَا .. مش كده يا شرس
.. اهدا ياملتهم .. تماسك يا تمساح .. عاوز تشمت فينا
الحكومات المدنية ..

(يخرج وهو يحاول التماسك)

طارق : (هامسا لنفسه) .. تمساح قال .. ولا السردين يعمل
كده ..

(يدخل البروفيسير وهو أشيب الشعر وله لحية
قصيرة ، يمسك بيده مؤشرا قصيرا)

البروفيسير : أيها السادة الرؤساء .. اسمعوا لى أن أقدم لكم
نفسى .. البروفيسير مايك وهو اسم مستعار ، حيث أن
النظام فى الأكاديمية يمنع ذكر اسم الأستاذ لعدم الاتصال
به أو التأثير عليه .. أيها السادة الرؤساء .. ان العالم
المتحضر كله .. والمتخلف أيضا .. ينظر لهذه التجربة
باهتمام شديد متمنيا نجاحها .. ونحن نعتد على اخلاصكم
الذى لا نشك فى وجوده لتحقيق حياة ديموقراطية هائلة
سعيدة لسكان كوكبنا الصغير .. من أجل غد تختفى فيه
الديكتاتورية .. وتصبح نقطة سوداء منقرضة كديناصور
قديم .. وفى محاضرة اليوم سنتحدث عن القوة .. والشرعية
(يكتب الكلمتين على السبورة) .. وأبدأ حديثى فأقول ،
القوة لا تنتج حقا شرعيا .. حد من حضراتكم .. يعرف من
الى قال الجملة دى ؟

(كل منهم ينظر للآخر فى قلق .. طارق يرفع
يده)

البروفيسير : اتفضل ..

طارق : روسو .. فى العقد الاجتماعى .

البروفيسير : صح ..

(الجميع ينظرون لطارق فى شراسة وحقد)

طارق : (يعتذر لهم هامسا) .. أنا آسف .. آخر مرة ..

البروفيسير : وحتى اذا استخدم المجتمع كله القوة لوضع شخص ما
فى السجن ، فان هذا يعطى لنفس الشخص الحق فى وضع
المجتمع كله فى السجن اذا توافرت له نفس القوة ..

(ينظر لطارق)

البروفيسير : حضرتك عندك فكرة مين قال الكلام ده ؟

طارق : للأسف لأ .. المفروض ان اللي قال الكلام ده .. جون
ستيوارت مل .. بس أنا ماعرفش ..

البروفيسير : صح .. وبذلك ..

(مؤثر موسيقى قوى يظهر معه حاكم جديد ..
يغمى على أحد الموجودين فى نفس اللحظة التى
يدخل فيها جورج ومعه الحقيقة والكارت ، يقوم
بإفاعة الشخص المغمى عليه ويعطيه الحقيقة
والكارت ، يخرج رافعا رأسه للسماء ، متمتما
ببعض الأدعية غير المسموعة ..)

البروفيسير : يعنى القوة لا تنتج حقا شرعيا .. مهما حاول الأقوياء
الادعاء بغير ذلك .. ولقد أثبت التاريخ ويثبت دائما أن هؤلاء
الذين أتوا على أسنة الرماح .. يذهبون على أسنة الرماح ..
كما أن هؤلاء الذين يأتون على أسنة الإرهاب .. ويذهبون
غالبًا على أسنة المخبرين .. كان لابد من هذه المقلمة قبل أن
ندخل فى موضوعنا الرئيسى وهو جمهورية أفلاطون ..

(يشرح بالمؤشر الصغير على لوحة الجسم البشرى)

البروفيسير : يرى أفلاطون أن تركيب المجتمع يماثل ويتطابق تركيب
جسم الإنسان .. فى أعلى السلم الاجتماعى .. الحكماء أو

محبى الحكمة .. الفلاسفة يعنى .. وهم يمثلون الرأس فى
جسم الانسان .. ثم (يشير الى الصدر) ... القوى الغضبية
.. ومكانها الصدر .. ودى طبقة الحراس .. الى هي القوات
المسلحة فى العصر الحديث .. ثم بقية طبقات المجتمع ..
وقد أطلق عليها اسم القوى الشهوية .. أن هذا التقسيم ..

(مؤثر موسيقى أكثر قوة .. يظهر كاباكا ..
يفهمى على بونجو .. يدخل جورج ومعه الحقيقية
وتبدأ اللعبة .. دخول شخص ثم اغماء الشخص
الآخر .. وجورج والحقيقية .. تستمر اللعبة ..
لا يكاد الواحد فيهم يستقر على مقعده لحظات)

البروفيسير : من فضلكم .. من فضلكم .. خفوا شوية .. اهدوا
.. يا جماعة لابد من الشرعية .. الى بتعملوه ده لا يستند
للشرعية .. ده شغل عافية ..

(مستهزين فى لعبتهم)

البروفيسير : أرجوكم .. كفاية انقلابات .. عاوزين نشتغل ..
السنة خلصت ولسه ماتعلمتوش حاجة .. عيب كده ..
اهدوا شوية .. يا أسيادنا .. يا حضرات ... استقروا
شوية على الكراسى .. أرجوكم .. العالم كله بيرجوكم ..
باقول ايه .. ماتضطرونش أجيب قوات طوارئ أحطها فى
الفصل ..

(تنتهى لعبة احتلال الأماكن ، يستقرون فى
أماكنهم .. وعلى الحركة والموسيقى والاضاءة فى
هذا المشهد الایحاء بالمرود الزمنى)

البروفيسير : من فضلكم .. بعد كده مش عاوز انقلابات أثناء
المحاضرة بتاعتى .. عندكم الفسحة وعندكم الخمس دقائق
الى بين المحاضرات .. وعندكم السبت والأحد أجازة ..

(فجأة ، كل أجراس التليفونات تدق ما عدا
تليفون طارق ، يرفعون سماعات التليفونات ثم
يضعونها وهم ينظرون لطارق فى شمانة)

طارق : (يواجههم مبتسما) .. عارف .. كل سنة وأنا طيب
.. وانتم بالصحة والسلامة .. (للأستاذ) .. فعلا
يا بروفيسير .. عندك حق .. القوة لا تنتج حقا شرعا ..

(طارق مرتبك ، ولكنه يحاول مداواة ارتباك
باصطناع قدر من المرح .. لكنه لا ينجح فى
مداواة احساسه بالصلابة)

.. بس صدقتى .. أنا ما وصلتش للحكم عن طريق القوة
.. ما كانش عندى قوة من أى نوع .. (لهم) .. شمتانين
طبعاً .. ماتفرحوش قوى .. أنا ماجيتش هنا على أسنة
الرماح .. أنا جيت على أسنة الاذاعة والتليفزيون ..
(ينادى) .. فينك يا جورج .. أول مرة ما يظهرش ..
أول مرة جورج الجاهز .. مايقاش جاهز ..

(يفتح الدرج ويلم أوراقه)

.. طبعاً لا فيه جورج .. ولا فيه شنطة .. ولا بيت صغير
ولا حساب سرى .. مالحتش أعمل أى حاجة .. ماكانش
عندى وقت .. وحتى لو كان فيه وقت .. ماكنتش حاطع
مليم بره البلد .. وده الفرق بيتى وبينكم .. وأدى النتيجة

.. (بلهجة خطابية يدارى بها احساسه باليأس الشديد) ..
آدى النتيجة .. ها أنذا أواجه العالم بمفردى .. وليس معى
دولار واحد .. عاريا .. طرزاننا .. فلا نامت أعين الجبناء ..
هه .. والله ما حد بيعرف ينام كويس الا الجبناء .. بس
يا ترى مين الى حايستلم منى ؟ مين الى عملها فى .. ؟

(عايدة تظهر واقفة بجوار الكالوس ، بعد دخولها
للحفظات جورج يظهر عند الكالوس الآخر ..
ذراع عايدة مربوط بالشاش .. إصابة أخرى فى
رأسها .. طارق مذهولا .. ينقل بصره بينها
وبين جورج)

جورج : (يهز رأسه نفيا) .. لا العالم الثالث لسه ماجربش
الحكاية دى ... هو ال .. هو الانقلاب حصل فعلا ..
والخبر الى جابته وكالات الأنباء صحيح .. بس الانقلاب
أحبط ..

طارق : أحبط ؟

جورج : أيوه .. والى قاموا بيه كلهم فى السجن دلوقت .. معايا
كشف بأساميهم .. شوية عيال من بتوع سنة تانية ..

(يغمز له بعينه ثم يرفح أصبعه علامة النصر وأخط
الطيب .. جرس المدرسة يندق .. جرس تقليدى
قديم .. المجموعة كلها تخرج ماعدا طارق وعايدة
.. يقترب كل منهما من الآخر ليقتفا لحظات فى
دائرة الضوء ... ثم)

اختفاء تدريجى

...
...
...
...
...

...
...
...
...
...

...
...
...
...

...
...
...

...
...
...
...
...

...
...

المشهد الثاني

(ظهور تدريجي للاضاءة على الفور .. جورج
يمسك بمفرش يضعه على أحد التخت ثم يضع
عليه فاقة بها زهور .. يحرك حبل في الخلفية
فتنزل ستارة رسم عليها بخطوط سريعة فرقة
موسيقية أو مجموعة عازفين .. موسيقى جاز
خافتة .. ينحن جورج أمامها وهو يكتب في
نوتة وهمية .. ينصرف ..)

عايدة : لما حكيت لك أخبار البلد .. ما كنتش عاوزاك تكتب كده ..

طارق : يعنى .. بس صدقيني .. وده مش كلام للاستهلاك المحلى
.. أنا حاكون سعيد أكثر لما تكلميني عن أخبارك ..

عايدة : أخبارى هي أخبار البلد ... طارق ، أنا كذبت عليك لما
قلت لك حصل لى حادثة .. أنا ماحصليش حوادث .. كل
ده (تشير الى اصابعها) .. من آثار فسخ الخطوبة ..

طارق : قصدك ايه .. اتعرضتى لتعذيب ؟

عايدة : لا .. ولا حد جه جانبى .. أنا اتعرضت لعملية تهذيب فى
المدرسة .. بمجرد ما أشيع خبر فسخ خطوبتنا .. مدرسة
الرياضة رجعت تانى ..

طارق : وبدأت تضربك .. ؟

عايدة : مش لوحدها .. بدأت أنضرب فى كل المواد ، ومن كل
المدرسين .. كان فيه مدرسين يمتنقلوا مدرستنا مخصوص
عشان يضربونى .. كل الأجزاء الى اتحذفت من مقرر

الرياضة رجعت تانى .. وفوقها رياضة بحته على رياضة
ذرية .. على مش عارفه ايه كمان ..

طارق : هس ممكن .. مش معقول ..

عايدة : فعلا .. مش ممكن ومش معقول .. بس حصل ..

(يدخل جورج ممثلاً دور الجرسون .. يبدأ فى
وضع أطباق وهمية على المائدة ثم يخرج .. يبدأ
فى تناول الطعام)

عايدة : مدرسة الجغرافيا ست بنت حلال قوى .. هى كمان انضمت
للصف وقعدت تضربنى .. تضربنى بالنهار وتجلى البيت
بالليل لابسة ملاية ومغطية وشها ..

طارق : ليه ؟

عايدة : عشان تعيط وتقول لى سامحيني يا بنتى .. متها لها لو
ماضرتينش .. حايعتبروها من عناصر الثورة المضادة ..

طارق : فطيع ..

عايدة : بدأت تحصل لنا مضايقات غريبة .. الماية ماتطلعناش ..
فى الدور الثانى .. وتطلع لكل الأدوار الى فوقينا .. فاتورة
التليفونات جت لنا وفيها مكالمات زيادة بثلاثة آلاف دينار ..
حتى الكمبيوتر الى بيحسب المكالمات ركب موجة النفاق ..
أبويا راح يحدد رخصة السيارة .. دفع ألف دينار مخالقات
زيادة .. كل ما يركن السيارة فى مكان ييجى الونش
يشيلها ... يسحب الى قدامها والى وراها ويأخذها ..

طارق : انتى بتجسمى الأمور قوى يا عايدة .. مش جايز تكون دى كلها صدف سيئة ..

عايدة : احتمال .. على العموم أنا باحكى لك الى حصل ..

طارق : وبعدين ..

عايدة : ما استحملتش .. سبت المدرسة .. قعدت فى البيت .. ثانى يوم طلع قانون يمنع البنات من ترك الدراسة .. وجه وزير المعارف بنفسه رجعى المدرسة .. بالمدرعات ..

طارق : بالمدرعات ؟

عايدة : مش عارفه اذا كانت مدرعات ولا سيارات مصفحة .. أنا كنت عند خالتى .. راح محاصر المنطقة وفتشها بيت بيت .. لحد ما لاقانى .. صدف سيئة دى كمان ؟

(طارق لا يستطيع الاجابة)

عايدة : بعث لك جوابات كتير .. واسترحامات وشكاوى ..

طارق : ماو

عايدة : (مقاطعة) .. ماوصلتكش .. وأنا باكتبها .. عارفة انها مش حاتوصلك .. ودلوقت أنا مش باطلب منك انك تصدقنى .. أو ماتصدقنيش .. أنا باطلب منك انك تحمينى .. مش بصفتى كنت خطيبتك .. فى يوم من الأيام .. لآ .. بصفتى مواطنة فى نظام انت مسئول عنه .. ومن حقى أعيش حياتى فى هدوء بدون مضايقات على الأقل لأنى مش من عناصر الثورة المضادة .. ومش مشتغلة بالسياسة أصلا ..

طارق : عايدة .. أنا آسف لكل الى حصل .. وأؤكد لك أنه مش
حايحصل تانى ..

عايدة : حاتصدر بيان رسمى ؟

طارق : لا .. بيان شرعى .. حاعمل الحاجة الى كان يجب عملها
من سنة .. يالله بينا ..

عايدة : على فين ؟

طارق : على السفارة بتاعتنا هنا فى جنيف .. حانكتب كتابنا ..
من صلاحيات السفير أنه يكتب كتابنا ..

(يدخل جورج)

جورج : من حسن حظكم يافندم ان الماذون بتاع بلدكم موجود فى
جنيف .. بيتعالج .. وعندى فكرة انه معزوم على العشا فى
السفارة (ينظر فى ساعته) ... يعنى ممكن تلهقوه ..

(يغمز له بعينه ويرفع أصبعه علامة التأييد ...)
يخرجان فى سعادة)

المشهد الثالث

(الفصل في الأكاديمية .. كاباتكا يدخل
بخطوات بطيئة .. يتعثر في سيره .. يستند
الى الجدران .. يبدو عليه أنه فى حالة ضياع
شديد وكأنه فقد أعز ما يملك فى لحظة .. أو
كانه تعرض لصدمة عصبية مروعة)

(بعد لحظات يدخل جورج مسرعا)

جورج : كاباتكا .. تأكد ان كل مشكلة فى الدنيا لها حل ..
ولا يهيك .. ماتضايقش نفسك .. هى صحيح مصيبة ..
ومصيبة كبيرة قوى .. أول مرة تحصل فى التاريخ .. بس
ممكن نتصرف ..

(كاباتكا يبتسم فى فرحة ثم يتحول وجهه الى
مسرح لانفعالات شتى .. يكتئب ثم يبتسم ، يكلم
أشخاصا دون أن يصدر عنه صوت .. ضائع
تماما .. يدخل البروفيسير)

البروفيسير : جورج .. الامتحان بعد عشر دقائق .. الأمم المتحدة
بعتت الأسئلة .. ؟

جورج : أيوه .. بس فيه مشكلة خطيرة جدا ..
البروفيسير : خير ؟

(يشير لكاباتكا)

البروفيسير : ماله ؟

جورج : حصل له شيء مؤلم ..

البروفيسير : ايه ؟

جورج : حب يعمل حركة اعلامية دولية قبل الامتحان .. حب يشبته
أنه استفاد من الدراسة وانه بقى ديموقراطى ..

البروفيسير : من حقه .. وبعدين ؟

جورج : سمح للمواطنين بالخروج من البلد .. بدون تأشيرة
خروج ..

البروفيسير : برافو .. كويس قوى .. وبعدين ؟

جورج : شعبه كله خرج .. القرار طلع تمانية بالليل .. وسبعة
الصبح ماكانش فيه مخلوق فى البلد ..

(كاباتاكا ينظر له فى ابتسامة سعيدة وبلهاء)

البروفيسير : بعد الامتحان مباشرة فيه حفلة التخرج .. الخبر ده
لو وصل للناس .. الفرح بتاع حفلة التخرج حايتهول لماتم
.. ويبقى أسوأ دعاية ضد الأكاديمية ...

طارق : وهو ده خبر يستخبي ؟ .. كل الجرايد والمجلات النهاردة
بتتكلم عن الحكاية دى ... المقال الرئيسى فى التاييمز تحت
عنوان « خرج ولم يعد » .. فى الجارديان المقال الرئيسى
تحت عنوان « الرجل الذى فقد شعبه » ...

البروفيسير : مش قصدى الخبر ده .. قصدى خبر انهياره ..
لازم العالم كله يعرف انه مش نادم على القرار ده .. وانه
سعيد بيه .. وانه واثق أن شعبه حايرجع له تانى .. وان
الديموقراطية عنده أهم من الحكم .. وأهم من وجود شعبه ..

طارق : فعلا .. الشعوب زائلة .. بس الديمقراطية ، هي اللي
باقية ..

جورج : حاول معاه ..

البروفيسير : أرجوك يا أخ طارق .. ساعدنا فى المسألة دي ..
مش لازم يحضر الامتحان .. أنا حاكته فى بدرجاته فى أعمال
السنة .. بس لازم يقول خطبة فى الاحتفال .. أنا حاضرم
له كلمة قصيرة .. ومطلوب انه يقولها بثبات وسعادة
حقيقية ..

طارق : نحاول معاه ..

البروفيسير : (وهو خارج) .. بسرعة .. أرجوكم ..

(أثناء المشهد ، كان كاباكا منهمكا فى اجراء حوار
مع أشخاص وهميين بنون صوت ، طارق وجورج
لا يعرفان من أين يبدأن)

طارق : (يقترب منه فى ود) .. ما انت كمان تلاقيك كنت مقفل
عليه قوى يا كاباكا .. خرج يشم شوية هوا .. وحاي رجع
على طول .. حايروح فين يعنى ؟ ولا يهكم ..

(لا استجابة من كاباكا)

جورج : شوف يا كاباكا عزيزى .. أنا كنت عاملها لك مفاجأة ..
لكن حاقول لك بقى .. شعبك كله موجود هنا فى سويسرا
.. جه عشان يحضر الاحتفالات بتخرجك .. من فرط حبه
ليك .. وبعد ما تاخذ البكالوريوس ، حايروح معاك .. أنا
أتعهد انه حايروح معاك ..

طارق : طب بلاش جورج .. تشقى فى أنا يا كاباكا .. أنا حاربو جهولك
بنفسى .. حاوصلهولك لحد البلد ..

(كاباكا ذاخلا عما حوله)

جورج : (هامسا لطارق) .. مانفعلنش دى ..

طارق : طب اسمع يا كاباكا .. اتحلت .. حانكلم لك زمايلك ..
لو كل واحد منهم اتبرع لك بخمسين ستين ألف مواطن ..
حايبقى عندك شعب كويس قوى ..

جورج : الامتحان حايبتدى يا كاباكا .. أرجوك .. (يلجأ للغضب
المفتعل) ايه يعنى شعب يا أخى ؟ فى ستين داهية .. صدقنى
وجوده زى عسمة .. كان بيعمل لك ايه يعنى ؟ كان جايب
لك الكلام والحديث .. كل ماتشنى حد .. يقعدوا يشتموك
فى أوروبا .. ده أنا افكرتك حاتفرح ..

طارق : زحمة على الفاضى .. دلوقت هناك هو .. أنا لو منك
أروح أحكم فى الرواق .. صدقنى يا كاباكا شعبك هو الى
خسران فى الحكاية دى ..

جورج : فعلا ... ولو لف الدنيا كلها ما حيلاقى حد زيك .. انت
راجل عملت الى عليك .. هو الى مالوش فى الطيب نصيب ..

طارق : (يفتعل فرحة كبيرة وكأنه وجد الحل) .. بس .. لقيتها
.. سيب الحكاية دى على الله وعلى ..

جورج : (يجاريه فى الفرحة) .. حاتعمل ايه .. ؟

طارق : حاكلم له الشعب السويسرى يروح بداله .. انت عارف
الناس هنا ظراف جدا .. ويحبوا يخدموا الغريب ..

ولا يمكن يتأخروا في طلب زى ده ... وحاخليك تنقلى
بنفسك ...

(يربت على كتفه ، يكاد يحتضنه)

طارق : بس تعاملهم كويس يا كاباكا يا حبيبي .. هه .. ماتقفلش
عليهم قوى .. شوف .. أنا ممكن أبعث لك شعبي .. بس
رزل قوى .. وحايضايك ..

(لا أمل في استعادة عقل كاباكا)

جورج : أرجوك .. اصرخ .. عيط .. زعق .. ألطم .. اعمل
أى حاجة .. أخرج من الحالة اللى انت فيها ماتستسلمش
للجنون ..

(لا أمل .. جورج ينظر لطارق فى يأس)

طارق : لا أمل .. نهاية حزينة لتمساح شرس أهبل .. يا أهبل
.. فيه تمساح ديموقراطى زيك يطلع قرار زى ده وينفذه ..
القراز حايطلع فى صحافة العالم كله .. وماتنفدوش .. تسدى
إشارة شمال ، وتدخل يمين .. تقول حاتمشى لقدام ، وترجع
لورا .. يبقى ابنك على كتفك وتدور عليه ؟

جورج : ده انت فهمت المقرر كويس قوى ..

طارق : طبعاً .. أنا فهمت حاجات كتير جداً ..

(جورج يرفع سماعة التليفون ويطلب رقماً)

جورج : جهزوا لي الأودة التي بتطل على البحيرة .. شخص شخص
الأهمية .. لأ .. مش جنون خطر .. هي صامدة .. صامدة
شعبية .. تؤ .. مش نزلة شعبية .. صامدة شعبية ..

(يضع سماعة التليفون)

جورج : قوم معايا يا كاباكا ..

(كاباكا لا يستجيب .. يستجبه جورج من يده
كالطفل ويخرج به بهوء)

طارق : جورج ..

(جورج يستشير ، طارق يشير بأصبعه لأسفل
إشارة الهزيمة .. يخرج .. يدخل بقية الطابفة
ويجلسون في أماكنهم .. يدخل البروفيسير)

البروفيسير : أيها السادة .. بعد لحظات توزع عليكم أوراق
الأسئلة .. وفي هذا المساء سوف تجتمع نخبة من أكبر
أساتذة العلوم السياسية في العالم كله لتصحيح أوراق
الامتحانات .. وغدا في الاستاد الكبير يجري الاحتفال بتخريج
الدفعة الأولى من الحكام العسكريين الديموقراطيين .. وبذلك
تبدأ صفحة جديدة في التاريخ ..

(جرس المدرسة ، يدخل جورج ومعه أوراق
الأسئلة ، يضعها أمام كل منهم .. يقرأون
الأسئلة ، كلهم يصابون بهامة ، من الواضح أن

الأسئلة صعبة ، يبدأون في اعتصار أذهانهم
بشكل مبالغ فيه ، طارق يجيب في هدوء وسرعة
.. يبدأون في اخراج البرشام من تحت الكابات
ومن داخل الجوارب .. ويبدأون في اخراج
الكتب من داخل القمصان يتنبه طارق (

طارق : الله .. ؟ ايه الى بيحصل ؟

البروفيسير : فيه حاجة يا سيد طارق .. ؟

طارق : حضرتك مش شايف .. ؟

البروفيسير : الحاكم العظيم هو الذى لا يتدخل فى شئون الآخرين
.. خليك فى نفسك ..

طارق : أيوه .. بس دى ..

(أحدهم يخرج مستسما يضعه أمامه .. يتبعه
الآخرون .. يضعون أمامهم المستندات والسكاكين
والطاوى .. والقنابل اليدوية .. وأصابع
الجلجنايت)

طارق : (يتراجع) .. دى حرية طبعا .. كل واحد حر طبعا ..
يجابوب بالطريقة الى عاوزها .. دى حرية شخصية .. أنا
آسف ..

(ينتهون من الاجابة .. يقومون واحدا بعد
الآخر بتسليم الأوراق)

طارق : طبعاً أنا أعجبى واحد فيهم .. لأنى لسه ماسلمتش الورقة .

(يتوقف عن الكتابة قليلا)

طارق : بروفيسير .. فى الامتحان الى من النوع ده .. من الأفضل
للانسان .. انه يشبت أنه مذاكرة المقرر ؟ .. والا يشبت انه
انسان شريف .. ؟

البروفيسير : على الانسان أن يكون شريف فى كل الأحوال ..

طارق : عندك حق .. (يقرأ) .. ماهو تقييمك لناهج الدراسة
فى الأكاديمية .. ؟ (يجيب) .. حق يراد به باطل ..
خدعة مدهونة ديموقراطية من أجل تشييت الديكتاتورية فى
أنحاء العالم الثالث .. كده .. يبقى ضمنت أخد صفر ..
تفضل ..

(يقدم ورقة الإجابة للبروفيسير)

البروفيسير : بالعكس .. الإجابة دى بتثبت إنك انسان شريف ..
وحاكم ديموقراطى فعلا .. وتضمن لك امتياز مع مرتبة

(جرس المدرسة ، اختفاء تدريجى ، على الفور
نستمع لموسيقى مهرجانات واحتفالات عالية ..
يغلب عليها طابع الآلات النحاسية)

المشهد الأخير

(يبدأ زملاء طارق فى الدخول ، أحمد . ابراهيم
.. الى آخر المجموعة ، يرتدون ثياباً مدنية انيقة
ويحملون باقات ورد)

ابراهيم : كويس كده .. حانعمل ايه دلوقت .. حانحضر الاحتفال
ازاى ؟

أحمد : نتصل بالحكومة السويسرية تشوف لنا هليكوپتر يودينا ..
أسامة : هو انت النهارده تعرف تتصل بجد .. البلد كلها مقلوبة ..
خليل : العطلة دى كلها منك انت يا حسن .. لميت الناس وركبتها
عربيات نقل .. وعلى آخر لحظة اكتشفت أن هالناش حدود
مع سويسرا .. مش كنت تسأل ..

حسن : أسأل مين ؟ .. أسألك انت ؟ .. ده انت الى لميت الناس
فى الأول وحطيتهم فى المراكب .. وفين وفين لما اكتشفت
أن سويسرا هاعندهاش بحر ..

خليل : الله .. بلد هالهاش موانئ على البحر .. يبقى العيب فى
أنا والا فى سويسرا ؟

أحمد : احنا مش جاينين نتخايق .. حانحضر الاحتفال ازاى .. ؟

مرسى : مش لازم نحضره .. نتابعه فى أى تليفزيون ..

سعد : خلاص .. روح انت و خليل اصطادوا لنا تليفزيون ..
بس بسرعة ..

(مرسى و خليل يغرجان)

أحمد : احنا بقى نوضب الفصل .. ونقعد نتفرج هنا .. (لزملائه)
.. باقول ايه .. الله الله على الجند ، والجدد الله عليه ..
اسمعوا .. احنا كلنا فى الهوا سوا .. أى حد منكم يغلط
بكلمة .. حافتش كل حاجة .. كله تمام .. فاهم انت وهو
.. الى حاجيب سيرة الطيارات حاجيب له سيرة العمارات
.. والى حاجيب سيرة الأنوبيسات ، حاجيب له سيرة
المراكب .. والى حاجيب سيرة الحسابات الى فى الينوك ..
حاجيب له سيرة الحسابات الجارية والنائمة والقاعدة ..

ابراهيم : جرى ايه يا ابو حميد ... وهى دى حاجة نتكلم فيها ؟

أحمد : باقول يعنى .. وتفهموا خليل ومرسى ..

سعد : هم فاهمين كل حاجة .

أحمد : طارق دلوقت حاكم شرعى معترف بيه من الدنيا كلها ..
وحاصل على بكالوريوس فى الديموقراطية بامتياز مع مرتبة
الشرف الأولى .. يعنى ممكن يسجننا كلنا ولا يهमे والدنيا
كلها تقف وراه ..

(يدخل خليل ومرسى ومعهما تليفزيون كبير
موضوع على مائدة تتحرك على عجل ، يضعان
التليفزيون فى وضع يتيح لهما جميعا رؤيته ..
وبحيت يصبح ظهره للمتفرجين ، يضعان توصيلة
الكهرباء فيرتفع صوت المذيع)

المذيع : أيها السادة فى كل أنحاء الدنيا .. أحييكم من الاستاد
الكبير فى جنيف .. حيث امتلات المدرجات بمئات الألوف من
البشر الذين جاءوا من كل أنحاء المعمورة ، يحتفلون بزوال وجه

الديكتاتورية البغيض .. انها المرة الأولى فى التاريخ التى
يجتمع فيها كل هذا العدد من الملوك والرؤساء .. والمفكرين
والفلاسفة والفنانين ..

هرسى : صوفيا لورين دى ؟

حسن : أيوه ..

خليل : والى جنبها ده عمر الشريف ؟

أحمد : كارتر يا غبى ..

المنيع : انها الفرحة الكبرى .. أعضاء الحكومة الأمريكية وأعضاء
الحكومة السوفيتية يبحضنوا حكام العالم الثالث ..

سمعد : ده يبحضنوههم قوى .. حايكسروا ضلوعهم .

المنيع : الجو النهارده فى جنيف جميل جدا .. كما لو كان بيحتفل
معانا .. والشعب السويسرى منامش طول الليل امبارح ..
فرحان بيرقص فى الشوارع .. والنظام داخل الاستاد بديع
جدا .. ومدير الأمن السويسرى عمل الى عليه .. ومن حقه
علينا .. اننا نوجه له الشكر .. كمان ماننساش السيد
رئيس الهيئة العامة ل الشاب الى ظاهر فى الصورة
هو طارق الرئيس .. الى طلع الأول على الدفعة .. شايفين
الورد الى قدامه قدامه .. كثير قوى .. لو الكاميرا حبت
تستعرضها .. حاتتعد شهر .. ورد من كل أنحاء العالم ..
هو الى حايخطب دلوقت .. حايقول كلمة الدفعة .. والأقمار
الصناعية حاتنقل كلمته لكل سكان العالم .. أهو
الكاميرا جايباه وهو قايم رايح على المنصة الرئيسية قدام
الميكروفونات .. والكاميرات .. بيخوض فى أمواج من آلاف

البشر .. لكن رجال الأمن السويسرى .. عاملين حسابهم ..
مضطوبين قوى .. واحنا بنشكرهم .. و .. (فجأة) ..
سادتى .. سادتى ..

(صياح شديد ، يظلم المسرح ، ثم يظهر طارق
فى بقعة ضوء بعيدة وأمامه المايكروفونات وخلفه
علم الأمم المتحدة)

طارق : يا سكان الأرض .. يا سكان الأرض ..

(يهدأ الصياح)

يا سكان الأرض .. أحبيكم .. (لحظة) .. بعضنا يصل
للحكم بدافع من الاحساس العميق بالوطنية .. وعند كبير منا
يصل اليه بدافع من المغامرة وعشق الخطر .. وأعتقد أننى
أنتمى للنوع الأخير وكلنا نعتبر أنفسنا ثوارا ، وكلنا نتمنى
لشعوبنا الصلاح والفلاح .. والذى ننجح فيه غالبا هو العودة
بشعوبنا للوراء .. ولذلك نبعت الحاجة لأكاديمية حكم
الشعوب ، نتعلم فيها الديموقراطية ثم نعود لنعطىها لشعوبنا
فتنحل المشكلة وتنامون مرتاحى البال والضمير .. وفكرة
انشاء المعهد بحد ذاتها نبيلة ، وهى ككل الأفكار النبيلة تولد
فى عقول الأنبياء ويسرقها اللصوص والفتوات ..

صوت مجهول المصادر : الله .. مش دى الخطبة الى كتبناها له ..

طارق : غير أننى والحق يقال ، لم أكتشف ما اكتشفته الا بعد
التحاقى بالأكاديمية لقد أتيت لى فرصة ذهبية للتعرف عن
قرب بزملائى الأعزاء الذين يحكمون قطعة كبيرة من الأرض
حكما عسكريا .. رأيتهم فى نفسى ، ورأيت نفسى فيهم وبدأت

أشعر بالخجل منهم ومن نفسى .. وبدأت أبعاد الخدعة كلها
تتكشف .. الديموقراطية لا تدرس .. ولكنها تمارس ..
وليس هناك حاكم ديموقراطى وآخر غير ديموقراطى .. هناك
حياة ديموقراطية وأخرى غير ديموقراطية ..

والديموقراطية لا تصنعها المعاهد أو حسن النوايا ..
ولكن تصنعها الشعوب .. بأن تصر عليها وتموت من أجلها
.. وأنتم يا من تنعمون بالديموقراطية فى بلادكم ، يا من
تعقدون أن التخلف والفقر والديكتاتورية شئ جدير ولائق
بنا فقط بدافع من الاحتقار - وهو كما تعلمون خطيئة -
أقول لكم ، لستم بعيدين عنا .. والعنف فى طرقات مدنكم
هو امتداد للعنف العقلى الذى تفرصونه علينا فى أوطاننا ..
وذلك عندما تتجاهلون أن الناس سواسية كأسنان المشط
وهذا شرط أصيل فى الديموقراطية ..

وهذا الذى تصنعونه الآن هو خدعة ، تضاف للخدع التى
تلعبنها على بلادى .. العالم الثالث .. والذى أصبح بفضل
ألعابكم الشيطانية عالما رابعا وخامسا وسادسا وسابعا ..
فأنتم تنتهزون الفرصة دائما لدفعه لآخر الصف ، بعيدا عن
الكبرياء والكرامة الانسانية ..

وأنا أعلن أمامكم رفضى لهذه الخدعة .. وأقدم استقالتي
.. وأطلب من زملائى العسكريين فى العالم كله .. أطالبهم
بحق الشرف العسكرى ..

صوت : اقطع الارسال ..

(تختفى صورته ثم تظهر لوحة مكتوب عليها
نأسف لقطع الارسال)

المذيع : أيها السادة .. فيه عاصفة رعدية عطلت الارسلال فى كل
الأقمار الصناعية .. والظاهر كمان السيد طارق تعب فجأة
أو جالته كرامب .. لأننى شايف رجال الأمن السويسرى
شايلىنه ويبحطوه فى طيارة هليكوبتر .. سليمة انشاء الله ..

(تختفى اللوحة .. تعود اضاءة المسرح لما كانت
عليه)

ابراهيم : طارق اتجنن ..

اسامة : لأ .. ماتجننش .. هو مجنون من الأول ، قلت لكم كده
ماصدقونيش ..

أحمد : يا جماعة انتم حاتحجروا على حريته ؟ .. احنا ناس
ديموقراطيين .. من حقه يستقيل ..

سعد : والحل ايه دلوقت .. ؟

أحمد : هو فيها حل .. نقبل الاستقالة ...

موسى : ونختار مين ؟

أحمد : نختار مين ؟ .. نختارونى طبعاً ..

خليل : لأ .. مش حانقبل الاستقالة ..

ابراهيم : أنا معاك .. هو تلاقيه قال كده فى لحظة نشوة .. بس
لما يبجي .. حانقله ..

حسن : نشوة ايه ؟ .. فيه واحد يحس بالنشوة يقوم يستقيل ..

ابراهيم : طبعا .. أصل طارق ده فنان .. لما شاف الكاميرات
والناس حب يعمل حاجة عظيمة ، راح مستقيل .. لو أنا
مطرحه أعمل كده ..

(طارق يدخل ، ومنذ لحظة دخوله يزداد إيقاع
المشهد إلى أقصى درجة)

طارق : سلام عليكم ..
الجميع : وعليكم السلام ورحمة الله وبركاته ..

(ينظر لهم ولا يجد ما يقوله ، يستدير ليخرج)

طارق : سلام عليكم ..
سمعنا : الله .. طارق .. رايح فين ؟
طارق : خلاص ..

ابراهيم : كل حاجة خلاص .. ماشى ..
أسامة : ماشى رايح فين ؟ .. هو لعب عيال ؟

طارق : اسمعوا يا جماعة .. مفيش داعي نخدع نفسنا .. مش
حانعرف نعمل حاجة .. لازم نسيب الحكم للمدنيين .. مش
عاوزينى أمشى .. خلاص .. كلنا نرجع الثانوية العسكرية
.. نرجع مكاننا الطبيعي .. سنة أولى ..

ابراهيم : (يهمس جانبا فى زهول) .. يا نهار اسود .. نرجع
تانى ؟

أحمد : والى خدناه ؟

سعد : مفيش حله يعرف يرجع الزمن لورا يا طارق .. انت ممكن
تعمل حاجات كثير قوى .. حاجات كثير جدا ..

طارق : زى ؟

سعد : آلاف المصانع .. نزرع ملايين الفلاديين .. بنبنى آلاف
المدارس ونعلم كل الناس ..

طارق : وعشان أعمل كده كله وأرسيه وأرسخه فى الأرض ، لازم
أعيش خمسمائة سنة .. وأنا مش حايعيش خمسمائة سنة ..
لكن الشعوب بتعيش .. خمسمائة وألف .. وللأبد .. هى
الى تعمل الحاجات دى ..

أسامة : أيوه يا طارق ، بس انت عارف أن شعبنا ..

طارق : (مقاطعا) .. آه .. قاصر ؟ .. مش حايعرف يعمل
الديموقراطية ؟ .. يبقى مايستحقهاش ، ومايستاهلهاش ..
وعليه انه يموت ويندثر .. مش حايبقى أول شعب اندثر
فى التاريخ .. يا جماعة افهمونى .. الحكم مش مكاننا ..
ومش شغلتنا .. مهمتنا أنبل مهمة فى التاريخ .. حماية
الآخرين .. الموت من أجل حياة الآخرين .. فيه أعظم من
كده فى الدنيا .. ؟ انتم عاوزين تدخلونا بيت جحا وبلا عيب
شيحه .. ؟ ليه .. لازم نحتل مكاننا الطبيعى .. خليكم
معايا .. (يشير لصورة الجسم البشرى) .. شوفوا الجسم
الى قدامكم ده .. شوفوا قدامه جميل .. وقد ايه قوى ،
لأن كل حاجة فى مكانها .. وكل حاجة بتقوم بوظيفتها ..
احنا هنا .. ده مكاننا (يشير للصدر) .. عاوزين تعرفوا
لما بنحكم جسم البلد بيبقى شكله ايه ؟ أهو ..

(الصورة مرسومة على مربعات خشبية ، ينزع
مكان الصدر ويضعه في أعلى الجسم فيصبح
الرأس في المنتصف)

طارق : وبعد شوية ، يبقى كده ..

(الرأس الآن في أسفل الجسم)

طارق : الدنيا كلها شايفانا كده دلوقت .. ويتعاملوا معنا على
هذا الأساس ..

أسامة : انت جاي دلوقت تقول لنا الكلام ده .. ؟

طارق : أيوه .. عشان أنا ..

(يدخل جورج في أقصى حالات الغضب ، يهسك
بمخدة صغيرة .. يلقيها على المسرح في غيظ)

جورج : ايه يا سيدى ؟ .. ايه ياخويا ؟ .. انت عملت دربكة فى
النظام العالمى كله .. اضطرابات فى افريقيا توتر فى أمريكا
الجنوبية .. سوق العملة اتبهدل .. الدولار وقع ..
الاسترلىنى اتنيل .. انت مقدر خطورة الى عملته ؟

طارق : من فضلك أنا مش عاوز أوصياء على .. وماتكلمنيش
باللهجة دى ..

جورج : ما أكلمش باللهجة دى ؟ .. بعد كل الى عملناه عشانك ؟

طارق : اخرس .. انت عاوز توحى لزمائى أنكم عملتوني .. ؟

جورج : لا .. بعينريتك .. بذكائك .. بقدراتك الذاتية .. طالب
 في سنة أولى ثانوى عسكرى يمسك بلد .. تصدقها انت؟ ..
 كل خطوة من الى حصل معمول حسابها بالكمبيوتر .. أنا
 عاوزك تفتكر وتسترجع الأحداث كويس .. الخدمة فى الليلة
 اياها كانت عليكم .. على سنة أولى (يشير للشخصيات)
 .. خليل واقف على السور الغربى .. مرسى ، على السور
 الشرقى .. حسن على السور البحرى .. حاشوفوا التلات
 عربيات والتلات خواجهات .. لازم ييجوا يحكوا قدامك
 وقدام أحمد .. رابعة وتالته وتانية لابسين طوارىء والسلاحيك
 مفتوح .. الكمبيوتر عارف درجة ذكائك بالضبط .. حاستنتج
 ان فيه تلات انقلابات .. معروف أحلام أحمد تعيلب .. ومعروف
 أنه غير قادر على التخطيط والقيادة .. وأنه حايستشير غرورك
 وحبك للمغامرة .. بعد كده احنا الى مهدنا لكم الطريق لكل
 حاجة .. مؤامرة أسامة احنا الى كشفناها .. لك ..
 وأحبطنا لك خمستاشر انقلاب .. فوق .. اوعى تتصور
 يا أخ طارق أن فيه حاجة اسمها الصدفة على الكرة الأرضية
 .. أى حاجة بتحصيل يوم الخميس متخطط لها من يوم
 السبت الى قبله .. طارق .. اطلب أى حاجة .. احنا
 ممكن نساعدك بأى حاجة ..

طارق : (يصمت لحظات) .. جورج .. أنا عاوزك تساعدني
 بحاجة واحدة بس .. ماتورينيش وشك تانى .. وأرجوك
 روح قول للكمبيوتر .. أن فيه واحد قال لا ..

(جورج ينهار على أحد الكراسى)

(تدخل عايدة)

عائدة : أنا جاهزة يا طارق .

طارق : وأنا جاهز يا حبيبتي ..

عائدة : حان روح فين ؟

طارق : ما عرفش .. لكن أكيد حانلاقي مكان .. مكان لسه
ماوصلوش الكمبيوتر ..

أحمد : طب بعد اذنك يا طارق .. حانتفاهم في المسألة دي ..

طارق : اتفضلوا .. وأتمنى لكم حظ طيب ..

(يخرجون بسرعة شديدة .. على الفور نستمع
لطلقات رصاص متفرقة)

عائدة : ايه ده .. ؟

طارق : بيتفاهموا .. وهى دي طريقة التفاهم الوحيدة اللى بيعرفوها
.. يالله بينا ..

(يضع يده في يدها في طريقهما للخروج ، قبل
أن يخرج يلتفت لجورج ، يغمز له بعينه ويشير
بأصبعه لأسفل علامة الهزيمة .. تثبت الصورة
.. ببطء شديد تنزل ...)

الاستاد